

筆記小說大觀

集

玉芝堂談薈

明徐應秋輯

第五冊

進步書局校印



玉芝堂談薈卷九

姑茂徐應秋君義父輯

飲量之弘

漢于定國為廷尉。飲酒至數石不亂。鄭康成飲酒一斛。袁紹嘗餞之。會者三百人。皆使離席行觴。自旦至暮。飲三百杯。而溫克之容無怠。盧植能飲一石。山巨源飲量至八斗。晉武令私益之。盡量而止。晉周顛飲一石。劉伶一石五斗。解醒前燕皇甫真。飲石餘不亂。後魏劉藻。一石不亂。南齊沈文季。飲至五斗。妻王錫女。飲亦至三斗。對飲竟日。而視事不廢。鄧元起。飲至一斛不亂。北史柳謩之一石不亂。陳後主與子弟日飲一石。孔珪飲酒七八斗。又滿寵馬融傳。玄劉京馮陵。皆至石餘。裴鈞與裴弘泰賭飲。酒器請在坐。銀器盡。斟酒滿之。隨飲以賜。弘泰可乎。自小至大。凡杯勺以至航船。最大者名銀海。共受一斗以上。飲之皆盡。以器覆地。足踏之。抱持而出。稱所得器。共二百餘兩。劉潛石曼卿輩。尤豪於飲。每飲必云幾日。一日興方濃。而酒垂竭。有醋三斗許。併飲之。歐陽永叔梅聖俞。俱量可盡百杯。每遇潛曼卿。輒為所困。撫言。王源中為承旨。有急召。賜酒二盤。每盤貯十金碗。每碗各容一升許。宣令並碗賜之。源中飲

之無餘。畧無醉容。國朝毛尚書伯溫常主湖廣鹿鳴宴。諸生七十二人。人陪一大白。不醉。劉中丞應箕以善飲聞。久瘧後與客盡雙鵝。二雞。燔蹄羊邊。燒酒兩甕俱盡。又合郡士夫與李守凌雲飲。凡三日。夕而李醒然。眾強應箕出相對。以大碗。盛酒舉之。各五架。應箕倒東壁。李僅顛泚量。又弘於應箕也。

食量之弘

食之多者。史彌康頗七十餘。一飯斗米。秤肉。山濤飲至八斗。醉後醞餚。折筋不休。苻堅拂蓋。郎夏默等三人。每食一石。肉三十斤。宋明帝噉白肉。至二百片。蜜漬鯪鯪。一頓數金鉢。蕭穎胃噉白肉。鱠。至二斗。馬希聲日食五十雞。齊王好食雞跖。日進雞七十。臨江王妃江無畏好食魚頭。日進鯽魚三百對。南燕慕容德時。逢陵長王鸞賜食。立盡一斛。范汪噉青梅。一斛都盡。宋張齊賢一食肥猪肉十餘斤。尉史密真一漆桶。窺公所飲食。如其物投櫃中。至暮漲溢桶外。趙丞相雄上殿奏事。上命內侍捧玉海容三升者進之。凡七賜。皆醕。繼以金拌。捧龍炊百枚。遂食至盡。又與客對飲。各盡酒三斗。猪羊肉各五斤。蒸糊五十事。本朝王端毅。起年九十餘。每晨起。連食牛羊犬豕肉。或雞鳧三大碗。碗可一二斤。熟菜一大盃。麵餅二盤。各堆高筋許。清酒二大碗。碗

可盛二斤。楊襄毅公博。每噉麵一甌。輒兩舉筋。凡十六舉筋。而罄八甌。又每食肉三斤許。包子三十。酒數升。陽城王太宰國光。蒲州王司馬崇古。皆長七尺。飲噉尤偉。陽城切白肉。作大臛。每進必一百臛。飲必三斗。大醉後面熱不能升公座。噉巨柿四十。頃刻都盡。嘉定人王全。以氣豪一鄉。徒步創婁塘鎮者。其食以一猪首一鵝佐。飲不飽。偶饑過其弟。以白雞子四十煮食之。云僅小支胃口而已。王提學世芳。噉肉立可盡十餘器。每進楊梅櫻柑橘。必十斤為度。而不吐核。王鈺舉進士第二人。魁岸善飲。噉自云生平惟三飽。常歸家。外家享之。極水陸之腴。一使朝鮮。噉芻豢皆殼蒸體。一使成宴奉天殿。上知其善噉。盡撤御膳。賜之後歸里家落。乃灸螺螄。燒紫茄配飯。亦必滿一鍋。王元美曰。王令賜級言其鄉有張令者。善飯。居恒不能飽。隣有驢鬻者。值輕買食之。肉至作兩大盤。盤各可十餘斤。胡餅各百餘。以一碗蒜泥。一碗醃。一碗茵。一盤醬。與婿共飲。用手撮之。頃刻都盡。又河南开副使者。一日宴於鄉紳家。其家善視饌。开醉飽甚。忽曰。肉雖多。不使勝食氣。問厨有米乎。量之得五升。作飯。噉至盡。乃就枕。波斯王每食酪肉麩蜜。至二石。肥大不能行。佛為說法勸解。乃減一石。

彈塙成字

小說中載伎術之巧有非學習所能者。酉陽雜俎建中初河北將軍姓夏於新泥墻安棘刺數十。取爛豆相去一丈擲豆貫於棘上而不差。一張芬曾為韋臯行軍。曲藝過人。彈弓力五斗。每塗牆彈成天下太平字。字體端妍。如人摹成。有一人於公宴席上以籌椀中綠豆擊蠅十不失一。一坐驚笑。芬曰。無費吾豆。遂指起蠅。拈其後脚。畧無脫者。仙史安期生能以醉墨灑石上。皆成桃花。彭宗能以一氣誦五千文。通為兩過音。甚清暢。酉陽雜俎魯般於肅州城南作木仙人。舉手指東南。吳地大旱三年。齋物巨千謝之。般為斷其一手。吳中即大雨。朝野僉載。則天如意中。海州進一匠。造十二辰車。迴轉正南。則午門。南馬頭人出。四方迴轉。不爽毫釐。北齊沙門靈昭甚有巧思。於山亭造流杯池船。每至帝前。引手取杯。船即自位。上有木小兒撫掌。與絲竹相應。飲訖放杯。便有木人刺還上飲。若不盡。船終不去。又胡太后使靈昭造七寶鏡臺。合有三十六宮。別有一婦人手各把鎖。纜下一關。三十六戶。一時自閉。若抽此關。諸門咸啟。婦人各出戶前。河中記稱向聲能於鼎鑪中。以手撥鴨卵成花。絳樹一聲。能歌兩曲。二人細聽。各聞一曲。一字不亂。或疑其一聲在鼻。唐張葆善畫。手握雙筆。一時齊下。一為枯枝。一為生枝。枯枝則乾裂。秋風生枝則潤含春澤。魏時有句驪客。善用

鐵取寸髮斬十餘段以鐵貫之。言髮中虛也。王子年拾遺記。秦有烈裔。膏國人口。含丹墨。嘆壁以成龍蛇。方寸內備列國。有五岳四瀆。紹興初。淮客申先生。每出攜一小釜。隨所至。滿注水。布青絲朱黃雜色於上。徐用牙篋撥開。使成長林絕島。烏鳥翔集。或作羣山夾江。漁艇烟波。或士女春遊。或詩人緩轡。日日不同。竟不得其要領。李叔詹常識一范陽山人。于私第後掘地為池。方丈深尺餘。泥以麻灰。日汲水滿之。候水不耗。具丹青墨硯。先援筆叩齒良久。乃縱筆水上。就視水色。渾渾耳。經日榻以細絹四幅。食頃舉出觀之。古松怪石。人物屋木。無不備也。宣和初。蜀道進一接花人。號曰劉幻。徽宗召赴御苑。居數月。中使詣苑簡較。則花木枝幹。十已剪去七八。驚詰之。曰。官無憂。至正月。奇花當盛開。姑少待之。至期。白中使請觀花。則已半開。枝萼晶瑩。品色迴絕。醪醱一本五色芍藥牡丹。變態百種。一叢數品花。一花數品色。池水未消。而金蓮重臺。繁香芬郁。光景榮爛。不可勝述。崔學能吹反潮之笛。吹已。積潮橫下。險於廣陵之濤。應用能於一錢上寫心經。又於麻粒上寫國泰民安四字。清異錄。沙門福全。生於金鄉。長於茶海。能注湯幻茶成一句。并點四甌。成一絕句。泛於湯表。小小物類。唾手辦耳。檀越日造門。求觀湯戲。全自詠曰。生成盞裏生丹青。巧盡天工學不

成却笑當時陸鴻漸煎茶贏得好聲名。

弄百禽

五雜俎京師戲者籠一小雀置小骨牌僅寸許擊小鐺一聲雀以口銜其機門使自開令取大牌則合六六出令取地牌則合么么出其應如響觀畢復擊鐺一聲雀入而門自閉蝦耕錄嘗見一弄百禽者蓄龜七枚大小凡七等置龜几上擊鼓以使之則第一等大者先至几心伏定第二等者從而登其背直至第七等小者登第六等之背乃豎身直伸其尾向上宛如小塔狀謂之烏龜疊塔又見蓄蝦蟆九枚先置小墩於席中其最大者乃踞坐之餘八小者左右對列大者作一聲衆亦作一聲大者作數聲衆亦作數聲既而小者一一至大者前點頭作聲如作禮狀而退謂之蝦蟆說法唐穆宗時飛龍衛士韓志和善雕木作鸞鶴鷓雀之形飲啄動靜與真無異發之則凌雲奮飛更雕踏床飾以金彩謂之見龍床置之則不見龍形踏之則鱗爪俱出又於懷中出柏木合方數寸中有物如蠅虎子一二百其形皆赤分為五隊令舞梁州上令樂工舉其曲無不中節每過致詞處則隱隱如蠅聲終纍纍而退嘉話錄京國頃歲街陌中有聚觀戲場者詢之乃二刺蝟對打令皆合節奏中章程又商陽雜

組于頓在襄陽。有山人王固見曰：「予有謁一技，自古所無者。」懷中出一竹節，及鼓，規纔運小寸，良久去竹之塞，折枝擊鼓筒中，蠅、虎子數百餘枚，列行而出，分為二隊，如對陣勢，擊或三或五，各隨鼓音變陣。天衝地軸，魚麗鶴列，俱備也。凡變合數陣，又復作隊入筒中。

別水性

漢蒲元性多奇思，得之天然，於斜谷為諸葛武侯鑄刀三千口，刀成告武侯曰：「漢水鈍弱，不任淬用，蜀江爽烈，是大金之元精也。」命人於成都取之，及取水至，元言此雜涪水八升，其人叩頭曰：「實于涪津覆水。」以涪水八升益之，李贊皇作相，有親知奉使京口，贊皇曰：「金山泉，楊子江中冷水，各置一壺，其人舉棹忘之，至石頭，乃汲一瓶歸獻。」李飲之曰：「江南水味變矣，此何似？」建業石頭城下水也。代宗朝，李季翔刺湖州，至維揚，逢陸處士鴻漸，李素熟陸名，泊楊子驛，將食，李曰：「陸君善於烹點，天下聞之，况楊子南零水，又殊絕，今者二妙，千載一時，豈可虛乎？」命軍士謹信者，操舟詣南零，陸和器以待之，俄水至，陸以杓揚其水曰：「江則江矣，非南零者，似臨崖之水，既傾至半，陸遽止之曰：「此是南零者矣。」使者大駭，伏罪曰：「某自南零至岸，而覆其半，挹岸水增之，處士之鑒神鑒也。」酉陽雜俎：魏賈鏘有奴善別水，嘗乘舟于黃河中流，以匏瓢接

河源水七八升經宿水如絳以釀酒名崑崙觴芳味妙絕

食鵝知黑白

食而知味。聖人以為難。如易牙之辯淄澠。士安之識桃杏汁。精於味者。亦尚能之。至師曠。荀勗。知飯為勞薪所炊。奇矣。晉史。苻堅從兄子朗。晉司馬道子。為設盛饌。問曰。關中之食孰若此。曰皆好。惟鹽味少生耳。或人殺雞以食之。朗曰。此雞棲恒半露。檢之皆驗。又食鵝。知黑白之處。人不信而試之。無毫釐之差。曲洧新聞。韓玉汝丞相性嗜鵝。必白者而後食。或以他色。詒之。輒能辨其詒。此理不可解也。

射錢中孔

射之精者。五代史。李克用掛鉞於樹。或立馬鞭百步射之。輒中天寶遺事。羽林將軍劉洪善騎射。嘗使人於風中擲鵝毛。連箭射之。無有不中。齊柳惲與瑯琊王瞻將射。嫌其皮濶。乃摘梅帖烏珠之上。發必命中。宣武靈后胡氏。幸西林園。自射針孔中之。又射中象牙簪。蕭琮遣人伏地持帖。琮馳馬射之。十發十中。持帖者亦不懼。宋史。康保裔善騎射。嘗握矢三十引。滿以射箭。鏑相連而墜。范廷召出獵。有羣鳥飛過。召發矢。並貫其三。王建次子元膺能射錢中孔。自抱畫毯擲馬上。馳而射之。無有不中。樂郊私

語。蘆溼巡簡口廉卿長騎射。無論鳥獸不及飛竄。雖塘塗上跳魚子蟹射之百不失一。夜每懸火竿上去竿三十步。暗中射火無不滅者。列子紀昌學射於飛衛。以微角之弧。朔逢之幹。射虱貫心。既盡飛衛之術。計天下敵已一人而已。乃謀殺飛衛。相遇於野。二人交射。矢鋒相觸。墜地而塵不揚。飛衛之矢先窮。紀遺一矢。既發。飛衛以棘端捍之。而無差焉。於是二子泣而投弓。請為父子。刻臂為誓。不得告術於人。劉錡善射。水斛滿以箭射。拔箭水注。隨以一矢室之人服其精。

棘刺扞矢

紀昌學射於飛衛。飛衛曰。爾先學不瞬。而後可言射矣。紀昌歸。偃卧其妻之機下。以目承牽。挺二年之後。雖雒末倒背而不瞬也。以告飛衛。飛衛曰。未也。亞學視而後可。視小如大。視微如著。而後告我。昌以釐懸虱於牖南面而望之。旬日之間。浸大也。三年之後。如車輪焉。以觀餘物。皆丘山也。乃以燕角之弧。朔逢之幹。射之。貫虱之心。而懸不絕。以告飛衛。飛衛高踏拊膺曰。汝得之矣。紀昌既盡衛之術。計天下之敵已者。一人而已。乃謀殺飛衛。相遇於野。二人交射。中路矢鋒相觸。而墜於地。而塵不揚。飛衛之矢先窮。紀昌遺一矢。既發。飛衛以棘刺之端扞之。而無差焉。於是二子泣而投

弓相拜於塗請為父子刻臂為誓不得告術於人子隋末有督君謨善閉目而射志其目則中目志其口則中口有王靈知者學射於君謨久之曲盡其妙欲射君謨獨擲其美君謨時無弓矢執一短刀前來輒截之末後一矢君謨張口承之遂齧其鏑於是笑曰汝學射三年惟未教汝齧鏑法耳

見雜俎

朱雀和鳴

英公徐勣初卜葬繇曰朱雀和鳴子孫盛榮張景藏問之曰所占者過也此所謂朱雀悲哀棺中見灰後孫徐敬業反斲英公棺焚其屍見灰之應也世說晉明帝解占冢宅聞郭璞為人葬帝微服往看問主人何以葬龍角此法當滅族主人曰此葬龍耳不出三年當致天子問耳

日行七百里

抱朴子杜子微服天門冬八十年日行三百里趙陀子服桂二十一年毛生日行五百里神仙傳彭祖時大宛山有青精先生子歲色如童子步行日過五百里白石先生煮白石為糧亦日行三四百里三國志虞翻能步行日三百里麥鐵杖日行五百里遼陳州一婦人為賊帥號白鷄鷄日可行二百里咸亨中神僧萬回幼時能三千

里致兄書朝往暮歸因名萬回東晉永和初燉煌沙門單道開絕穀阜陵太守迎之道開步行從西平一日行七百里至秦州

手舉萬鈞

古今有力者蜀五丁力能移山手舉萬鈞秦烏獲孟育俱能舉千鈞千鈞蓋衛石蕃能負沙一千二百斗當為一百二十石孟賁生拔牛角淮南子桀之力能伸鐵鈞索其臣推移大戲水殺龜鼉陸捕熊虎帝世紀紂能倒曳九牛撫梁易柱墨子紂生捕虎豹指畫殺人費仲惡來足走千里手制兕虎六韜紂之卒握炭流湯者十八人崇侯虎等舉六百石重沙二十四人項王拔山扛鼎千人皆廢魏任城王章曳虎尾頓象鼻文帝鑄萬鈞鐘力士百人引之不動章乃負之而趨北魏盧曹長九尺餘與沙門曇讚埒嘗以海馬脰骨為馬稍諸將莫能舉晉桓石虔趨捷絕倫於獵園中見猛獸被數箭而伏戲令拔箭因急往拔一箭猛獸踞躍石虔亦跳高於猛獸復拔一箭而歸隋唐嘉話秦叔寶膂力絕人其所持槍常越重制初從太宗圍王世充於洛陽馳馬頓至城下而去城中數十人拔之不動叔寶復馳馬舉之以還唐宋令文有神力禪定寺有牛觸令文袒裼接兩角拔之應手而倒頸骨皆折而死又以五指撮確紫壁上

書得四十字詩為太學生以一手挾講堂柱起壓同舍生衣於柱下羊侃以指挾壁
八三寸弓力至三十石泗州人各長八丈大十圍執而對擊之俱碎又唐彭博通督
力絕倫曾於講堂堦上臨堦而立取鞋一鞞以臂挾之使人之有力者從後拔之鞋
底中斷脚終不移牛駕車正走倒曳車尾却行數步曾遊瓜步有急風張帆捉尾纜
挽之不進嘗與壯士魏弘哲宋令文馮師本角力博通堅卧三人奪其枕三人力極
床脚盡折而枕不動觀者踣牆屋宇盡壞宴客遇暝獨持兩床降堦就月酒饋尊俎
畧無傾瀉又汪節有神力渭橋石獅重千鈞節提而擲之數十人不能動以賂請節
節又提而致之故地嘗對御俯身負一石碾置二丈方木於碾上木上又置一床床
上坐龜茲樂人一部曲終而下乾符中綿竹王俳優腰負一船船中載十二人舞梁
州一曲畧無困乏宋景濂載元人鄧弼以力雄隣牛方鬪拳其脊折仆地市門石鼓
十人昇弗能舉兩手持之行舞雙劍虎吼而前善槩者五十人持槩並進辟易五十
步面無人色已而煙塵漲天但見雙劍雲霧中連斬馬首墜地又小說載國初有吳
齊公力逾千斤嘗遇巨艦怒帆順風吳在下風以手逆拓之船為開丈許有劇盜聞
之將甘心焉往謁之吳知微服應門留客坐烹茶取巨竹本如碗大者折之碎為數

片盜驚問何人曰齋公之僕也盜默然辭去每遇力作取巨絙如臂者寸寸斷之始解此其驍獷亦可方駕古人矣又楊大眼以繩長三丈繫髻而走繩直如矢馬馳不及見者驚嘆唐忠武將軍辛承嗣輕捷曾解鞍絆馬脫衣而卧令一人百步走馬持槍而來承嗣鞴馬解絆着衣擐甲上馬盤槍逆拒刺馬擒人而還李罕之多力或與人相毆毆其左頰右頰血流段成式門下騶路神通能戴石荃鞞六百斤齧破石栗數十隋書沈光傳初建禪定寺其中幡竿高十餘丈適遇繩絕非人力所及諸僧患之光以口銜索拍竿而上直至龍頭繫繩畢手足皆放透空而下以掌拒地倒行數十步觀者駭悅時人號為肉飛仙耳目記唐柴駙馬紹之弟有材力輕趨迅捷聳身以上捉燕若飛十數步乃止嘗着吉莫靴上埽城直至女墻手無扳引又以足指緣佛殿柱至簷頭捻椽覆上越百尺樓閣子無障礙時人號為壁飛杜伏威與陳稜戰於齊州裨將射中伏威額怒曰不殺射者終不拔此箭緣是奮入獲所射者乃令拔箭然後斬首隋唐嘉話高開道作亂幽州矢陷其頰召醫出之對以鏃深不可出則俾斬之又召一人如前對則又斬之又召一人乃曰可出然須忍痛因鉞面鑿骨置撲於其間骨裂開寸餘抽出箭鏃開道奏伎進膳不輟北齊將彭樂勇猛無雙時干

沙苑與宇文護戰樂乘醉深入被刺肝膈俱出內之不盡截去之後入戰護兵遂敗

關朗筮易

魏王彥問關朗以百年之數筮得六之革捨著嘆曰當今大運不過二傳五傳從甲

申魏宣武上之元年至戊申天下當大亂禍始宮掖革六二以柔居中有藩臣柄政世伏共強爾朱榮

臣主俱屠莊帝殺爾朱榮當有二雄舉而中原分二雄九五九三高不戰德而詐權

則舊者先亡革故也東魏先亡辛丑之歲當有恭儉之主起布衣而併六合必在西北夫平

大亂必以武定北用武之國也己酉之歲江東其危乎開皇元年平陳晚節末路桀紂之主

出焉帝場天下復亂道不終亡也有達者興焉文中其後魏之亂自胡后始爾朱榮高

歡宇文泰分霸隋平陳場帝之世天下大亂皆如其占然則左氏所載周太史筮陳

敬仲知其後必代齊史蘇占晉伯姬而及懷惠之亂豈可謂誣乎傳初菴立以占筮

起東南時杭州初內附世皇以故都之地生聚浩煩資力殷盛得無有再興者命占

其將來何如卦既成曰其地六七十後會見城市生荆棘不如今多也今杭連厄

於火自至正壬辰以來數厄於兵昔時歌舞之地悉為草莽之墟行營雜錄載道君

皇帝大觀二年戊子秋八月以易數占乃御製易運碑刻之延福殿東壁其畧曰始

建元基高宗御紹興德壽謂紹興年承太乙循運盡在陽九之數高宗聖壽祖傳甲

庚吉太祖子孫再傳建炎炎其盛之勢建炎年號奈何五行逆順天地之數非絲人致朕常聞易

孰善本基庚子辛丑禍起東南謂方阿平動干戈元衝立劫壬寅癸卯宣和間天亦

云哀哉甲辰乙巳與金虜火丙午丁未金虜入寇丙午丁未二帝北狩丙午丁未丙午丁未天下生靈塗炭至半是時

天下江表之虞駕幸莫知何辜戊申己酉高宗初立時劫災苗劉內變庚戌辛亥偏重勢

輕高宗航海劉壬子癸丑後成改建紹興甲寅乙卯立應豐稷是年丙辰丁巳朕已

何在徽宗於汴祖宗復有中興之後是年孝宗以建國公封晉云云其後事皆歷驗

信乎聖哲先知之明因往推來在天數者果不可遣與

析字謔語

蜀使張奉嘲尚書令闕澤姓名澤不能答薛綜下行乃云蜀者何也有犬為獨無犬

為蜀橫目勾身蟲入其腹奉曰不當復嘲吳君耶綜應聲曰無口為天有口為吳君

臨萬邦天子之都啟顏錄北齊徐之才善謔常嘲王訢姓云有言則誣近夫則狂加

頭足而為馬配尾角而成羊又嘗宴賓客時盧元明在坐戲弄之才姓云卿姓徐字

乃未入人之才即嘲盧字安亡為虐在丘為虛生男為虜配馬為驢又嘲元明二字

去頭則是元明出頭則是元明滅半則是無目變聲則是無肯蘇頌少能言有京兆過其父環命詠尹字乃曰丑雖有足甲不全身見君無口知伊少人又蔡忠惠戲陳亞曰陳亞有心終是惡亞應聲曰蔡襄無口即成衰唐甘洽與王仙客友善因以姓相嘲洽曰王計爾應姓田為爾面撥獺抽却你兩邊仙客曰甘計爾應姓丹為伊頭不曲迴脚向上安狄梁公戲同官郎盧獻曰足下配馬乃作驢獻曰中劈明公乃成二犬傑曰狄字犬旁火也獻曰犬邊火乃是煮熟狗

返魂攝魂

古人有返魂之術唐玄宗幸蜀後屬念貴妃聞廣漢楊通幽有考召之法於內置場遍加搜訪至蓬萊南宮西廡見上元女仙太真授以金釵鈿合寄玉龜子為信即長恨歌所云鴻都道士羽衣客能以精神致魂魄者也此術自漢有之拾遺記漢武帝嬖李夫人夫人死後帝思見之董仲君曰黑河之北對都之野地出潛英之石其色青質輕如羽冬則石溫夏則石冷刻為人像能傳譯人語有聲無氣仲君因至閩海得此石刻夫人像置輕紗幕中宛若生時又唐闕史京兆韋進士納洛妓頗惑之五年而卒生悲咽痛悼嵩山任處士有返魂術但須一經身之衣以導其魂韋搜衣筒餘

一金縷裙是夕任為致之燃蠟炬於香前持裙面幃而招忽聞吁嘆之聲俄映幃微出與之言頷首而已歛欲逼之倏然而滅任曰漚珠槿艷不足多懷韋長慟賦詩惆悵金泥簇蝶裙春來猶自伴行雲不教布施剛留得渾似初逢李少君靈異記許至雍妻早亡雍每感嘆悲泣一日忽覺有人行吁嘆聲良久聞語乃是亡妻云若欲相見遇趙十四無惜三貫六百錢自此常記其言後數年至蘇州將謁吳太伯廟遇男巫趙十四名何者陳懇切之意遂為召其亡魂言語悲喜恩情如生良久趙生曰可去矣許相隨涕泣曰願惠一物可以為記妻泣曰幽冥惟有淚可以傳於人代許脫一汗衫置地取懸樹枝掩面大哭取汗衫視之皆血淚也列異記北海營陵道人為人致亡婦約聞鼓聲即出與婦相見恩情如生良久聞鼓聲當出戶衣挂戶間掣絕而去後歲餘開塚見婦棺下有衣裾洞微志蘇德歌為徐肇返先代魂云死經八十一年以上即不可返雲溪友議祖山人為韋臯致玉簫魂齋戒七日清夜玉簫果至續定命錄李行修初娶王仲舒女王氏以疾終秘書衛隨曰侍御念亡夫人之深何不問稠桑王老及行修除東臺御史次稠桑驛有王老善錄命行修悟衛秘書之言密令召之遂說所懷之事王老引行修繇一徑入土山中坡側隱隱見叢林老人謂

行修曰但於林下呼妙子有人應即答云傳語九娘子今夜暫將妙子同看亡妻有頃一女子引行修到一處云十一郎且坐娘子續出行修比苦肺疾王氏嘗與備治疾阜英子湯青衣持湯令行修啜馬宛是王氏手煎之味言未竟夫人遽出行修方欲申情王氏曰與君幽顯異途不當如此苟不忘平生但納小妹即于某之道盡矣已聞門外女子叫李十一郎速出依前同行却至舊所行修心憤然一嘔所飲阜英子湯出馬皆灼灼可記者又有能致人生魂者廣異記天寶末長安有馬二娘者善考召兗州刺史蘇說與馬氏相善說欲為子萊求婚盧氏謂馬曰我一子必求淑婉盧氏三女未知誰佳幸為致之令其母自閱視馬於佛堂結壇考召三女魂迷惑至馬云大者不如次者必為刺史婦天寶末萊為永寧令死祿山之難贈萊懷州刺史畫譜葉法善欲求李北海書碑北海為括蒼太守不可強乃攝其魂書之北海夢中書碑竟醒而遣人追視宛如夢中今名攝魂碑宣室志尚書王潛節度荆南有京兆呂氏子以饑寒遠謁公公不為禮有市門監俞叟見呂生色有不足呂具述其事叟曰為設小術以助歸糧可乎因覆一缶於地有頃啟視見一紫衣人長五寸許指曰此王公也呂熟視酷類馬叟因戒曰呂生以食貧千里而至宜厚卹以展親親何恃貴

忘故耶。紫衣僂而揖。叟曰：呂生無行資，可致一馬一僕，練二百匹。紫衣又僂而揖。於是復覆以缶，再啟之，無見矣。及旦，叟促呂歸。王公果召與宴遊，贈以僕馬及練二百。又張易在洛陽，遇劉處士，有奇術，劉嘗賣銀練市中，人負其直往索之，不酬。且大詈。劉歸，謂易曰：吾夜當小懲之。既滅燭，劉床頭熾炭燒藥，易寐未熟，暗中見一人吹火，火光中識其面，乃向市人也。迨曙，問市人云：夕夢人召使吹火，氣殆不續。聞天傳信，記開元中宮禁有美人，每夜夢被人邀去，縱酒密會，極歡而歸，歸輒流汗，倦急，帝曰：此必術士所為。若復往，隨宜以物識之。其夕熟寐，飄然又往，美人見石硯在前，乃密印手文於曲房屏風之上，帝潛為物色。於東明觀得屏風，手文尚在。所居道士已遁矣。宣室志：海南楊居士有奇術，會太守亦好奇，每宴遊必召與俱。一日偶忤守，於郡堂閱妓樂，而居士不與，或笑之。居士曰：君觀我為君召其妓具酒，命小童閉西廡一空室，久之乃啟，有三四美人自廡下，粧飾華煥，攜樂而至，列坐歌飲，至夜分，曰：可歸矣。於是皆起，仍入空室中，客相目駭嘆，尚疑鬼物。明日有郡吏曰：太守昨宴郡閣，妓樂無故仆地，暴風飄樂器去，迨夜方寤，樂器亦歸，竟不窮其繇。宣和間洛陽李嶽少年豪邁，常遊阡陌間，值某太守自南郡解印還洛，家富聲樂，一寵姬殊秀妖麗，嶽於牡

丹園一見如癡時有猪嘴道人售異術於塵中。噉具以誠告。明日招往以一片瓦呵呪移時。付噉曰。持此於庭壁間上下劃之。當如願矣。噉如教。壁劃然中開。竦身而入。曲室內。斗帳畫屏。極為華美。婦處其中。宿醒未解。見噉却立。癡笑。遂登榻盡歡。循故道而出。壁合如初。瓦故在手。此後過三日。輒一往。因洩於友人。後遂不驗。

遣使鬼魂

元世祖誅阿合馬。籍其家有妾名引住者。搜其藏得二熟人皮於櫃中。兩耳俱存。局鑰甚固。問莫知為何人。但云。詛呪時置神座上。其應如響。漢時宮中巫蠱。但得木偶人耳。未聞以人皮者。近時妖人有生剖割人而煉其魂。以為前知者。南村輟耕錄。陝西宣慰司呈八匝街王弼告。至正三年九月。到義利坊店。見有算卦王先生。因問來歷。致爭。當月夜睡房窗下。似風吹葫蘆聲。虛空中言算卦先生使我來。哭聲內稱冤。枉弼祝之曰。爾神爾鬼。明以告我。鬼云。我是豐州黑河村周大女。月惜夜出後院。被王先生將我殺了。做奴婢使喚。如今教在你家作怪。抄寫所說。赴官陳告。於房內搜獲木印黑繩。上釘鐵鍼。四個。壓鎮女身。小紙人八個。五色彩五色絨。俱頭髮相纏。又小葫蘆一個。上拴紅繩。內盛琥珀珠二顆。外包五色絨。朱書符命一沓。又告十二月。

初三有鬼空中言。我是奉元路南坊。耿大男頑驢。被老先生殺了。二十二日又有鬼空中云。我是察罕腦兒。李帖家孩兒。延奴老賊殺了我。勘問得王萬里。吉安路民習課命。逢劉先生云。會採生魂。使去人家作禍。廣得財物。我有收下的。賣與你。隨取出五色彩帛。并頭髮相結一塊。稱這個名喚延奴。我算性格聰明。用符命法水。呪語迷惑。活割鼻口唇舌尖耳朶眼睛。呪取活氣。剖腸掏割心肝各小塊。曬乾搗羅為末。收裏用五色彩帛。同生魂頭髮相結。用紙作人形樣。呪遣往人家作怪。劉先生焚香念呪。分付李延奴與先生作伴。可改名買賣萬里。買得并傳符呪。又逢廣州舊識。鄺先生亦會遣使鬼魂。買得紙人兒一個。名耿頑童。到大同路黑河村。周大家課命。將伊女周月。惜八字看算。要將殺害收采生魂。見月惜於後院牆下。出後萬里念呪。將月惜禁止端。立將額皮割開。扯下懸蓋眼睛。及將頭髮割一縷。用紙人并五色彩帛。絨線相結一塊。一如人形。然後割鼻口唇舌尖眼睛。手十指。梢脚十指。梢却剖胸。將心肝肺各割一塊。曬乾搗末。裝小葫蘆內。因到君易店。與王弼相爭。令生魂前往本家作禍。因買馬肉店內。將牛肉作馬肉賣。因此不能收禁。事發到官。宋景濂有秦州王弼傳。亦具著其事。云廬陵王萬里。以妖術行。延安龍河市。辱於弼。夜遣鬼物害之。弼

聞悲嘯聲。啟戶無所見。翌日。晝哭於門。弼語之鬼曰。我周氏女。名月。西居大同豐州之黑河。年十六。母疾。父召萬里卜。萬里以兒生年月。禁架昏迷。負至柳林穴。兒心肝。吮切精魂。使附於紙。為奴。稍怠。則以針刺。不勝痛苦。君其為兒白寃。時在弼坐者十人。聯署姓名。具白於縣。急捕伏辜。後有二鬼泣言。我為耿頑童。李延奴。寃與月西類。三鬼遂終。依於弼。洪武四年十二月。有司誤謂弼有異術。貢於朝。太祖賜以花幣。遣還。見補博物志。

金蠶蠱蟲

鐵山園叢談。金蠶毒始自蜀中。近及湖廣。兩粵尤多。有人舍去。則謂之嫁金蠶。加以黃金釵器。置道左。俾他人得焉。鬱林守為吾言。常見福清縣有訟。遭金蠶毒者。縣官求治不得。蹤或獻謀。取兩刺蝟入捕。必獲矣。蓋金蠶畏蝟。蝟入其家。金蠶則不敢動。雖匿榻下。墻罅。果為兩蝟擒出。亦可駭也。北史隋獨叔。其外家先事猫鬼。上令高顯蘇威雜案之。而阤婢徐阿尼。其言本從阤母家來。常事猫鬼。每以子日夜祀之。猫鬼每殺人。被殺者家財遂移於畜猫鬼家。於是免死除名。宋史乾德二年。夏。曾徙永州。諸縣民之畜蠶者三百二十六家。於縣之僻處。不得復齒於鄉。閩謝在杭曰。蠶蟲

北海所無。獨西南方有之。閩廣滇桂關中延綏臨洮俱有。但其方不同耳。大約以端午日取蛇蜈蚣蜥蜴蜘蛛之屬。聚為一器。聽其自咬。其完盡死。獨留其一。則毒之尤矣。以時祭之。俾其行毒。毒初行。必試一人。若無過客。則以家中一人當之。中毒者。絞痛吐逆。十指俱黑。嚼豆不腥。含礬不苦。是其驗也。其毒遠發十載。近發一時。初發可用甘草萊豆解之。真麻油吐之。三月以後。不可為矣。隋書云。其害屢世相傳不絕。自侯景之亂。殺戮殆盡。蠱家多絕。既無主人。故飛遊道路。中之則殞。今此俗移於滇中。每遇夜中。則此蟲飛出飲水。其光如星。鮑照詩所謂吹蠱痛行暉也。又有桃生蠱。食雞魚之類。皆變為生者。又能易人手足。及心肝腎腸之屬。及死視之。皆木石也。又金蠱。毒川筑有之。食以蜀錦。其色如金。取其糞置飲食中。毒入必死。能致他人財物。祀之者多致富。夷堅志所載。有得物者。夜而蛇至。其人知其蠱也。遂捉而啖之。至盡。飲酒數斗而卧。帖然無恙也。余崇禎乙亥。僑員閩泉。時值審決。其一因為惠安林文會。蓄蠱害人。初救解輒愈。嗣仇其族。寘毒食中。漸覺腹痛。手足俱軟。吐蛇身死。屍軟如綿。死後。復有細蛇自口中溢出。證確論死。曾親見其獄牘。稱蓄蠱之家。飛塵不集。又云。蠱毒上不踰莆之楓亭。下不過泉之洛陽橋。亦一異聞也。又讀沈存中筆談云。予在中

書較正。閱雷州奏牘。有人為鄉民詛死。問其狀。鄉民能以熟食呪之。俄頃膾炙之類。悉復為生肉。又呪之。則生肉遂活。牛者復為牛。羊者復為羊。但小耳。更呪之。則漸大。既而復呪之。則還為熟肉。人有食其肉。覺腹中淫淫而動。必以金帛求解。金帛不至。則腹裂而死。所食牛羊。自裂中出耳。談貴州夷民雜處。多闕術。能以木易人之足。郡丞某過其地。記室二人。皆遊於淫地。一人與淫。其夫怨之。易其一足。一人不與淫。婦怨之。易其一足。明日躑躅於庭。丞知逮其人。始邀歸作法。而足如故。又黔筑有變鬼人。能魅人至死。有遊僧至山寺中。與數人宿。夜深聞羊聲。便入室就睡者。連嗅之。僧以杖擊之。踣地。乃一裸體婦人也。將以送官。家人羅拜乞命。乃舍之。他日僧出。見上官方生瘞人。問之曰。捉得變鬼人也。

卜思鬼術增

楮談建昌有楚夷善幻術。彼人葬尸未朽者。焚至墳所。禹步誦呪。尸即自穴透出。變為牛馬。用以充餽。或鬼婁而賣之。又三宣慰中。有妖術曰卜思鬼。婦人習之。夜化為貓犬。行竊人家。遇有病者。舐其手足。嗅其口鼻。則攝其肉。唾於水。化為水蝦。取而貨之。蠻莫之外。有曰地羊鬼者。髡首黃目黑面。而猙醜。能以泥土沙石換人及牛馬五臟。

忤之者必被其害。死后如蟬蛻然。卜思鬼惟狗可以敗之地。羊鬼袒服皆青。則無害。

入定煉形

佛經稱世尊遷象頭山入定。鵲巢于頂。傳燈錄。宋政和二年。嘉定奏本部路旁古樹。因風摧折。中有一僧禪定。鬚髮被體。指爪繞身。勅肩輿入京。命西天總持三藏。以金磬出其定。遂問何代僧。曰。東林遠法師之弟。急持。因遊蛾眉。入定於樹七百年矣。酉陽雜俎。上都務本坊。貞元中。有一家掘地。遇一石函。發之。見物如蒲絲。滿函。飛出於外。驚視之際。忽有人出於函中。被白髮長丈餘。振衣而起。出門遂失所在。蓋道家太陰煉形。日將滿。人必露之。

記三生事

今世所奉文昌像。為梓童帝君。其人即張惡子也。按文昌化書。神姓張氏。出黃帝之子。名揮。始造絃張網羅。因以為姓。初為山陰張氏子。有孝行。傳法水醫藥救人。事周公。以壽終。復投胎於諫臣張無思妻黃氏。為遺腹子。詩所謂張仲孝友。幽王初。以諫賜醜死。魂遊於雪山。為神。治蜀五丁。拔蛇而壓死。蛇即神所化也。尋為漢趙王如意。為呂氏所殺。魂散蕩無所歸。孝宣世。至印池。其令曰。呂牟。即呂氏後身。母戚夫人。亦生

於戚嫁張翁老無子相與割臂出血瀝野石白中祝曰倘生一動物亦遺體也自是感而托生為蛇金色逾年頂生角腹生足呂氏有馬呂產之後身也拘而啖之令繫張翁夫婦於獄乃吸雲霧化風雷揚海水灌城邑周四十里皆陷以所殺多謹為印池龍受熱沙小蟲之苦遇釋迦文佛歸誠脫罪復生於趙國張禹名勳為清河令卒復生於世為孝仲西晉末復生於越雋終時夢治水府尋為吏所請跨白驢而去到一山下有古湫入石穴悟七十三化其說甚誕然記前生事小說多有之唐吳官劉三復能記三生事常云前生作馬渴則望驛而嘶傷蹄則連心痛廣異記曲沃縣尉孫孟家奴前身作狸為獵人所殪遂生海州為乞人子饑寒二十而死閻王云與作貴家奴已三生矣塵餘北京指揮朱某知三世事初次為蛇云伏草中每至暑熱遍體荼毒不可忍饑渴且甚求死不得望見車來橫道中欲令碾殺將車人見之顧反走後見樵人伐薪乃入薪束中伏遂為樵人斫死再生為猪不數月膈壯見屠雖死而魂不散人每市肉一片則魂亦分隨之至入釜始滅肉盡乃已三生為馬云不畏鞭惟脚踢其前脇則痛楚非常每至登高痛徹心骨今生乃獲為人每至乘馬登高未嘗不為下也釋鑑永徽中龍懷寺曇相禪師臨終語弟子會當生廣漢綿竹峰頂

王氏七年後汝來見吾。其後會造峰頂問。扣扉者誰。會曰。弟子會也。得師聲。猶昔聲耳。遂奉之。再歸龍懷寺。神異日顯。為慧寬禪師。俗呼聖和尚。寬自言十世為大儒。著十生記。霏雪錄。元薛公世南。為山西僉憲。時一皮匠。忽晝見二急脚。召渠。是日死。二三日復蘇。云一官府。設王者衛一人。冕服坐殿廷。問曰。汝知過否。匠曰。某有生以來。未嘗造惡。王者命以物如青泥之狀塗其頂。久之。心骨醒然。累世之事。皆能記憶。王者曰。白起坑長平四十萬卒。汝不預乎。其人乃王紇九世身。對曰。起坑卒時。某阻之不聽。非某罪也。上帝以某有陰德。賜某八世為將。今九世矣。俄械起。至羸然鬼囚也。對質復押入獄。遂放還。自後棄業。出入士大夫家。能談其前世事。

占驗風角

占驗風角之術。有不可以理測者。異苑清河王經去官還家。管輅與相見。經曰。近有一怪。大不喜之。欲煩作卦。卦成。輅曰。又吉。不為怪也。君夜在堂戶前。一流光如燕雀者。入君懷中。殷殷有聲。內神不安。解衣彷徨。招呼婦人。覓索餘光。經大笑曰。實如君言。輅曰。吉。遷官之徵也。頃之。為江夏太守。搜神記。劉安。河中也。少時得病死。見天帝。未來之事。皆預知之。河間有一趙廣家。槽上馬忽變作人面。全家大驚。問劉安曰。

此大惡也。君急歸家。去宅三里披髮大叫。即可免。廣乃依言。家中大小一時走出。看之。堂屋崩倒。全家得免。乃贈財贖與安。問此災何繇。安曰。堂屋西壁下深三尺。當有三個石柱。今已慎勿發。此神龍也。視之必貧。廣掘看之。果有一物。赤色。大如柱。飛出。廣大貧。一如其言。世語。曹爽夢二虎啣雷公。若二升椀。放着廷中。爽惡之。以問卜者。馬訓。訓曰。憂兵不出旬日。爽果以兵亡。南越志。南海以鰓頭為杯。晉康州刺史常以杯獻簡文。以盛酒。未及飲。酒躍於外。時廬江太守曲安遠筮之曰。即三旬。後庭有告變者。果有生子。人面犬身。又搜神記。車騎將軍巴郡馮緄。初為議郎。發綬笥。有二赤蛇。可長二尺。分南北走。大用憂怖。許憲得其先人秘方。使卜之曰。此吉祥也。君後三歲當為邊將。官以東為名。居無何。拜遼東太守。南征將軍。異苑。晉陵韋朗家。在延陵。元嘉中。忽見庭前井中有人出。齊長寸許。被帶俱甲。麾伍相應。相隨出門。良久。乃盡。朗兄數善占筮。常云。吾子弟當至刺史。朗歷青廣二州宣室志。唐丞相李揆。乾元初。為中書舍人。嘗退朝。見一白狐在庭中。搗練石上。命侍僮逐之。已無見矣。時有客於揆行者。因話其事。客曰。此祥符也。某敢賀。明日果遷禮部侍郎。後魏書。有兔入於后宮。檢問門官。無從得入。太祖令崔浩推其咎徵。浩以為當有隣國貢嬪。嬙者。明年姚

興來獻女魏安平太守王基筮於管輅輅曰君家有三怪一則生男女墮地走入室竈死二則大蛇牀上啣筆三則烏入室與燕闔三者足以為異而非凶兆後果無患晉武帝咸寧元年八月丁酉大風折大社樹有青氣出焉此青祥也占曰東莞當有帝者明年元帝生

自焚致雨

戴封張熹皆以大旱禱請無應積火自焚火起而雨大至王尊以河決廬居境上水決至足而止古道史何琦俱以隣火伏父棺哭屋俱得全梁山壅河三日不逝晉潁公縞素哭之而水流海水噴激百里為墟錢越王彊弩射之而潮息至耿恭疏勒拜井而得水泉以制虜諸葛亮赤壁祭風而轉東風以破曹王暎討突厥阻風雪失期乃仰天設誓遂止雪迴風以濟戎事張守珪節度瓜州砂礫少水地無林木稼穡營繆殊苦絀乏乃設祭祀禮禱經宿而山水湧至材木塞澗而來百事乃濟卒成重鎮天道助順呼吸必應如此

醫士國手

華陀過郡守知其瘀血在腹中令其子盡言平昔之愆為書罵之遂嘔黑血升餘而

愈紀明治宮人每至日晏即笑歌啼號足不能及地知其因食飽而太促力所致飲以雲母湯令熟睡而所苦頓失富商暴亡梁新因其好食竹雞知為半夏毒薑汁灌之而愈蘄水富家子驚懼入市見市上陳屍走仆屍上性理遂錯為求得縛因繩為灰調服一飲而愈桐城孕婦七日不產龐安時鍼其虎口使縮手而免下梁新遇朝士風疾告以不可治趙鄂教以食消梨而愈王太后病風餌液不可進許胤宗以黃耆防風煎湯置床下薰之而能言年少食鱸不快眼前常見小鏡趙脚誑以會食使啜芥醋而愈皇子癩癧錢乙以土勝水水平而風自止進黃龍湯一劑而安吳門孕婦不下葛可久以初秋氣未足取桐葉飲之立下寧宗為郡王病淋日夜凡三百起孫珍以大蒜淡豆豉蒸餅三物合為丸利其水道而病遂除張知閣久瘧餌葶附而熱愈甚改以柴胡湯療其髓熱而勞瘧不復發少年子得軟脚疾以杜仲用酒行之而足遂瘳張文定公苦脚疾無藥可療遊相國寺有賣藥者得菜豆兩粒服之遂愈曾魯公七十餘苦痢鄉人陳應之用水梅花臘茶服之而差新昌徐氏婦病產已死但胸前猶微熱有名醫診之曰此血悶也求紅花數十斤以婦人寢窗格上煮氣蒸之而蘇朱師古疾不能食聞葷腥即嘔用鐺煮淡飯數數啜之史載之曰此在素問經

中名食挂。凡人肺六葉舒張下覆於脾。一有或戾則肺不能舒。脾為之蔽。經曰肺葉焦熱掛是也。授方服之。聞食肉香。取啖之而痊。華州人兒。鼻端生贅如拳石。蒂綴鼻。纔如筋。觸之痛入骨。兩睛俱翻白。狄梁公於腦後針之。針氣達患處。贅應手而落。雙目頓亦如初。崔務隆馬折足。有醫令取銅末和酒服之。遂平。亡後視其骨折處。銅末束之。唐高宗苦風眩。目不能視。召醫秦鳴鶴刺百會及腦戶出血。而眼遂明。于敖青衣為崔侍御所得。忽暴死。梁革曰。此非死乃尸蹶也。刺心及臍下數處。衣以單衣。卧床。縛其手足。置微火於床下。稍甦。以茵粥灌之。而青衣遂活。此皆秦經切理。因古用奇而妙。出意表。俄頃奏工。可稱俞扁再生矣。至嗣伯治老嫗之針。疔。賈耽視老人之蟲。瘰。徐之才見脚痛者。而知為蛤精疾。周顧見黃門而識其腹中有蛇。龍華院見女子右膝患瘡。而截狗足熱貼右足柱。赤蛇從瘡中出。鬼患腰痛。徐秋夫束芻作人。按孔針之。而鬼來致謝。宋明帝宮人腰疼。牽心發。即氣絕。徐之才知為髮。瘰。以油灌之。吐一物如髮。成形能動。而疾遂平。復又逢婦人有孕。知其一男一女。男在左邊。青黑色。而形小於女。視世之庸工俗醫。豈啻相去九牛毛也。

水晶屏上美人

聞奇錄。唐趙顏于畫工處得一畫圖。美女。工曰。此神畫也。呼真真。百日即應。應即以
百家彩灰煮酒灌之。趙如言呼之。遂活。行步言笑飲食如常。終歲生一兒。免年兩歲。
偶一友人以為妖。贈之寶劍。欲斬之。真真曰。某南嶽地仙也。君呼妾來。今又疑妾。
不可住。即攜其子上圖。圖上添一小兒矣。小說秀才方喬慕紫玉。有寄情詩曰。眉如
遠岫首如螭。得得相思不得親。若使畫工圖軟障。何妨百日喚真真。簡齋黑梅詩。窗
間光景晚來新。半幅溪藤萬里春。從此不貪江路好。賸拚心力喚真真。皆用其事。南
村輟耕錄。載溫那監郡。其一女及笄。以疾卒。命工畫其像。任滿。偶忘取去。新監郡未娶。忽
得之。以懸於臥室。一夕見其下。從軸中詣榻前。遂與好合。至必深夜。去以五鼓。後啖
以餅餌。竟不能去。宛然人也。特不能言語耳。楊國忠水晶屏上刻美人形。可二三寸。
置之樓上。嘗偃息其下。一日國忠獨卧屏上。諸女各通姓名。國忠驚叱歸屏上。未幾
果敗。西陽雜俎。荊州張七政。畫一婦人於壁。酌酒滿杯飲之。酒無遺滴。逡巡畫婦人
面亦半日許。江南徐謬。得畫牛。畫嚼草檻外。夜則歸卧欄中。持以見後主。煜煜獻闕
下。太宗問羣臣。俱無知者。僧贊寧曰。南海或減。則灘漬微露。倭人拾方諸中。有餘淚
數滴。得之和色。則晝隱而夜顯。沃焦山時。或風擊。有石落海岸。得之滴水。摩色染物。

則畫顯而夜晦。諸學士皆以為無稽。曰見張騫海外異物記。後餽檢三館書目。果於六朝舊書中載之。八朝名畫錄。顧光寶能畫。建康有陸溉。患瘧經年。光寶以墨圖一獅子。外戶榜之。中夜戶外有窻窳之聲。良久乃不聞。明日所畫獅子口中臆前有血淋漓。溉病乃愈。北齊楊子華常畫馬於壁。夜聽聞啼蓄長鳴。如索水草聲。李思訓畫大同殿壁。并掩障。夜聞水聲。張僧繇畫龍。點一睛。使破壁飛去。韓幹畫馬。鬼使乘之以請鬻。吳道子畫驢。踏破僧家具。禹廟梅梁。張僧繇畫龍於上。一夕風雨。飛入鏡湖。次日見梁間有水藻。夷堅志。臨川貢士張擗。赴省試。行次玉道中。暮宿旅舍。揭荐治榻。得絹畫一幅。展視之。乃一美人寫真。其旁題四娘二字。擗旅懷淫蕩。注目不釋。沽酒獨酌。持杯接其吻。曰能為我飲否。燈下恍惚。覺軸上應聲。莞爾微笑。醉而就枕。覺有女子卧其側。曰我是卷中人。感爾多情。故來相伴。自是夜夜必來。試罷西歸。與之訣別。曰我宿緣合伉儷。今則未也。瞥然而去。擗尋約婚於吳氏。妻之容貌類卷中人。而行亦第四。開筭出示。無絲毫。不似吳氏。長幼驚異。此畫之通靈也。又有異人幻術。能騰身入畫者。酉陽雜俎。貞元末。開州軍將冉從長。輕財好士。儒生道者多依之。有畫人寧采圖。為竹林會甚工。坐客郭萱柳城二秀才。每以氣相軋。柳忽眇圖曰。此圖為

公設薄伎請入畫中治之乃騰身赴圖而滅客大駭久之曰郭子信未聲若出畫中也食頃瞥自圖上墜下指阮籍像曰工夫祇及此衆視之覺籍像唇若方嘯纂異記陳季卿家江南辭家十年羈遲輦下嘗訪僧青龍寺有終南山翁同擁爐而坐東壁有寰瀛圖季卿尋江南路長嘆曰得自渭泛於河遊洛濟以達於家亦不悔無成而歸翁笑曰此不難致乃命折階前一竹葉作舟置圖中渭水之上曰公但注目此舟則如願耳季卿熟視稍覺渭水波浪一葉漸大席帆既張恍然登舟旬餘至家復登葉舟遵舊途至於渭濱乃賃乘復遊青龍寺宛然見山翁擁褐而坐曰得非夢乎後二月季卿妻子費金帛自江南來訪之始知非夢也括異志三山曾先生涉膏廡館陳氏七載音信不通有道士自吳山曰子思卿何不少歸曰水陸三千里幾時得到道士剪紙為馬令合眼上馬以水噉之其疾如風囑曰汝歸不可久留須臾到家妻令入浴易新衣涉便上馬馬足折驚寤乃身在館中隨水衣服皆新製者道人亦不見

醫卜無定法

魏志周宣善占夢或有問宣者昨夢芻狗宣曰君當得美食未幾復云夢芻狗曰當

墮車折脚尋而又云夢芻狗宣曰當有火災後皆如所言其人曰吾實不夢聊試君耳三占不同皆驗何也宣曰意形於言便占吉凶且芻狗者祭神之物故君初言夢之當得美食也祭祀畢則為所轆當墮車傷折車轆之後必載以棺故云失火南史徐嗣伯精於醫術曾有一媪患滯痰積年不差嗣伯為之診候曰此屍注也當須死人枕煮服之可愈於是就古塚中得一枕服之即差後秣陵人張景年十五腹脹而黃象醫不療以問嗣伯曰此石虵耳當以死人枕煮服之依語煮枕以服之瀉出虵蟲頭堅如石者五六升病即差後沈僧翼眼痛又多見鬼物以問之嗣伯曰邪氣入肝可覓死人枕煮服之竟仍埋如故處如其言又愈王晏知而問之曰三病不同而皆用死人枕療之俱差何也答屍注者鬼氣也伏而未起故令人沉滯得死人枕促之魂氣飛越不復附體故屍注可差石虵者醫療既僻虵蟲轉堅世間藥不能除所以須鬼物驅之然後可散也夫邪氣入肝故使眼痛而見魍魎應須邪物以鈎其氣因而去之所以令埋於故處也晏深嘆其神妙固知醫卜一理原無定法要在人之靈悟耳如占雨得剝李業興以坤上艮下艮為山山出雲占為有雨吳過世以坤為地土尅水為無雨而卒無雨卜二牛先起得火作郭生以火色赤謂亦牛先起鞠超

以火將然。煙先發。謂青牛先起。而卒如鞠言。隋唐嘉話。李太史與張文收。率吏坐。有暴風自南至。李以甫五里。當有哭者。張以為有音樂。左右馳觀之。則遇送葬者。有鼓吹馬。

禱雨之奇

牛相公僧孺。鎮襄州日。久旱祈禱無應。有處士不記姓名。眾云。豢龍者。公請致雨。處士曰。江漢間無龍。獨一湫。洎中有之。黑龍也。強駭。遂必慮為災。難制。公固命之。果有大雨。漢水泛漲。漂溺萬戶。次柳氏。舊聞玄宗常幸東都。天大旱。時聖善寺有天竺乾僧無畏。號三藏。善召龍致雨之術。上召之。請雨。曰。今旱數當然耳。召龍必興。烈風雨。適足暴物。不可為也。上強使之。有司為陳請雨之具。悉命去之。獨盛一鉢水。以小刀攪旋之。胡言數百。祝水。須臾有如龍狀。其大類指。赤色。首噴水上。無畏復以刀攪水。頃之。白氣自鉢中興。如爐煙上。稍稍引出。講堂外。如一匹練。既而昏靈大風。雷霆而雨。從容錄。魏郡開成中。大旱。徧禱山岳。或言西沈陸先生。道行精明。請之必驗。迨至。呼吸數過。五指連拂之。爪甲間皆出雲煙之氣。惟中氣象甚盛。先生曰。郡中雨得足。諸縣皆獲八分。亦小稔。既而其說不誣。俞震齋沙人。秘傳符籙。精五雷祈禱術。同時

有黃天玄者。住持宜福觀。亦能此術。洪武二十年。閩中大旱。藩司召二人祈雨。既至。分東西立壇。分書朱墨二符。私約曰。吾二人雨。當如其符色。乃以書符朱墨二硯。分投水缸中。須臾雨至。一壇水黑。一壇水紅。時並異之。俞晚居其里之三官堂。一日有老媪來見曰。某山母龍也。行雨失律。天公震怒。劫在日午。望法官相拯。俞曰。能幻形小之乎。媪作蜺蜺。俞取投盃中。覆以令牌。端坐俟之。須臾暴雨擊。至數遍。過午乃息。俞曰。去矣。龍出。仍化為媪。拜謝曰。他日法官祈雨。媪當効力。於是每三年輒來一朝。歲六月初旬。有暴風疾雨。繇南而北。人曰。龍姑朝俞云。

玉芝堂談薈卷九終

玉芝堂談薈卷十

姑蔑徐應秋君義父輯

女子男飾

女子詐為男子者。唐昭義軍兵馬使國子祭酒石氏朔方兵馬使御史大夫孟氏外蜀司戶叅軍黃崇嘏臨邛人作詩上蜀相周庠。庠首薦之。屢攝府縣吏事精敏。胥徒畏服。庠欲妻以女。嘏以詩辭之曰。一辭拾翠碧江湄。貧守蓬茅但賦詩。自着藍衫居郡椽。永拋鸞鏡畫蛾眉。立身卓爾青松操。挺志堅然白壁姿。幕府若容為坦腹。願天速變作男兒。庠大驚。具述本末。乃嫁之。傳奇有女狀元春桃記。即其事也。南史東陽女子婁逞詐為丈夫。粗知圍碁。曉文義。徧遊公卿間。官至揚州議曹錄事。事發明帝。驅之還東。幽怪錄謝小娥八歲喪母。父畜巨產。商賈江湖間。小娥年十四。父與夫俱為盜所殺。小娥夢父謂曰。殺我者車中猴。東門草。復夢其夫曰。殺我者禾中走。一日夫小娥不自解。廣求知者辯之。李公佐罷江西從事。扁舟泊建業。詢得其繇。乃憑檻書空。凝思默慮曰。殺汝父者申蘭。殺汝夫者申春也。夫猴申生也。車去兩頭而言猴。是申字耳。草而門。門而東。非蘭字耶。禾中走者。穿田過亦申字。一日加夫。蓋春字耳。

小娥悲喜交集更為男子服備保江湖間至潯陽有紙榜召傭問其主申蘭也
投蘭引歸心憤貌順甚見親愛蘭與春宗昆弟也一日春携酒至蘭群賊畢至春
沉醉蘭露寢于庭小娥潜鑊春于内抽珮刀先斷蘭首呼號隣人擒春于内獲贓收
貨數至千萬春党數十暗記其名悉就擒戮時元和十二年也小娥既復夫父之仇
歸本里里中爭求聘娶娥誓心不嫁訪道于牛頭山乾闥子三原南董地曰張大夫
店貞元未有一媪曰吾年二十六嫁與張訾為妻訾為汾陽所任常在汾陽左右訾
之貌酷相類吾訾卒汾陽念之吾遂偽衣丈夫衣冠投名為訾弟請事汾陽令替闕
如此又寡居十五年已七十二軍中累奏兼御史大夫忽思梵獨遂嫁此店潘老為
婦邇來復誕二子曰滔曰渠是吾兒也名勝志順慶府南有都尉墓都尉娘西克女
子也代父戍以功授都尉歸為嫂氏所嘲乃刲腹見肝腎以死葬鳳了山墓前翁仲
猶存焦氏筆乘國朝蜀韓氏女遭明玉珍之亂易男子服飾從征雲南七年人無知
者后遇其叔始携以歸小說宣德間河西務劉翁夫婦業沽酒家亦小康年俱六十
餘無子值雪甚有童子隨父投宿及明父病數日竟死此男遂留為兒名劉方居二
載復值大風有少年覆舟遇救持一竹籠詢之則山東劉奇父聽選在京遭疫父母

俱喪籠中乃火化遺骨也。劉翁惻然為助資命。奇去月餘復來云。故鄉河決已漂盡矣。願乞片地埋骨而身為僕役以報劉翁許之。奇與方遂為兄弟。久之劉夫婦俱沒。方復往京携母柩至與父合葬。事畢停沽酒而開布肆。家事日起。有來議姻者。奇欲之。而方執意不可。一日見梁燕營巢。奇題一詞于壁云。營巢燕雙雙雄。朝暮啣泥辛苦同。若不尋雌繼聲卵。巢成畢竟巢還空。方亦援筆和詩云。營巢燕雙雙飛。天設雌雄事久期。雌者得雄願已足。雄首將雌朝不知。奇大驚曰。吾弟殆木蘭乎。自同卧以來。即酷暑未嘗赤體合之。題詞可知也。乃佯為不悟。使方再和。方復書曰。營巢燕聲聲叶。莫使青春空歲月。可憐和氏璧無瑕。何事楚君偏不納。奇笑曰。吾弟果女子也。方面發赤。奇固問之。慶額告曰。妾向寓京師。因母喪隨父還鄉。恐途中不便。故為男扮。後繇父沒。未得與母同穴。故不敢改形。今幸喪事已畢。即欲自明。思家事尚微。兄獨力難成。故復遲遲耳。奇曰。弟詞中有俯就之意。昔為兄弟。今為夫婦。不亦可乎。方曰。妾籌之熟矣。三宗墳墓俱在于此。亦難忍然。兄若不棄。共奉三姓家香火。妾之願也。是夜兩人分席而卧。次日請鎮中年老者為媒。遂成花燭。里中傳為異事。因名其地為三義村。金陵黃善聰。十二失母。父以販香為業。詭為男粧。携之廬鳳間。父死。

變姓名為張勝。有李英者，亦販香自金陵來，為夥伴。與同卧起，三年不知其女也。女歸而返女服，呼媪驗之，猶然處子。英託人致聘，女不從。鄰里交勸，遂歸于英。濟寧李東以進士授知縣，與妓女王四兒往來甚密。及遷御史，令王詐為閹者，自隨。事露，為銓曹所黜。王從，不忍舍。東鬱鬱得疾死，王自縊，不獨世所傳木蘭祝英臺也。

男子女飾

男人詐為女粧者，江湖記聞。宋端平丙申年，廣州尼董師秀有姿色，偶有欲淫之者，卒揣其陰。男子也，事聞于官，驗之，女也。一生婆令仰卧，以鹽肉水漬其陰，令犬舐之。已而陰中果露男形，如龜頭出殼，窮治身帶二形，不男不女。所歷州縣富室大家，作過不可枚舉。遂處之死。國朝成化間，太原府石州人桑柘，自少纏足習女工，作寡婦妝，遊行平陽。真定順德濟南等四十五州縣，凡人家有好女子，即以教女工為名，密處誘戲，與之姦淫，有不從者，即以迷藥噴其身，念呪語使不得動。如是數夕，輒移他處。故久而不敗，聞男子聲，輒奔避。如是十餘年，姦室女以數百。後至晉州，有趙文舉者，酷好寡婦，聞而說之，詐以妻為其妹，延入共宿。中夜啟門就之，大呼不從。趙扼其吭，褫其衣，乃一男子也。擒之吐實，且云其師谷山西山陰人，一為此術，尚有同黨任。

茂張端王大喜任昉等十餘人捕之具獄磔于市耳談戴冲有壓魅法以雞子一枚去清桃仁七個搗爛燒酒合成噴女身上默誦呪語女迷而姦遂行其術凡十八年汗有名女一百八十二人清尊錄興元民有得闌遺小兒者以為子數歲美姿首民夫婦計曰使女也教之歌舞獨不售數十萬錢耶婦曰固可詐為也因納深屋中節其飲食膚髮腰步皆飾為之比年十二三嫫然美女子也携至成都教以新聲又絕警慧益秘焉不使人見曰此女當歸之貴人于是女僧及貴游好事者踵門一覲面輒避去猶得錢數千謂之看錢久之有某通判者來成都一見心醉與值至七十萬錢乃售既成券喜甚置酒與客飲夜半客去擁而致之房男子也大驚使捕其父母亦卒不獲

瀝血求尸

梁武帝第二子綜封豫章王初母吳淑媛在齊東昏侯宮及幸武帝七月而生綜宮中多疑之及綜年十四常夢一少年肥壯自挈其首對綜非一問母母問夢中形狀類東昏因密報之勿泄綜遂于別室祠齋廟然猶無以自信聞俗說以生者血瀝死者骨滲即為父子綜私發東昏墓出其骨瀝血試之既驗在西州生次男餘月潛殺

之既瘞發其骨又試之唐王少元父死兵遺腹生十歲問父所在母以告即哀泣求尸時野中白骨覆歷或曰以子血漬而滲者父骨也少元鑿膚開旬而獲事俱見本傳。

前身輪迴

前身之說多矣如平子後身為中郎徐陵後身為什威武侯後身為韋臯鄒陽十三世為蘇軾瑯琊僧後身為張方平五臺僧後身為馮京張車騎後身為張睢陽五戒僧後身為子瞻鄧禹後身為范滂夫李德裕後身為趙鼎才名功業頗足相當至于許玄度之為蕭譽永師之為房瑄謝靈運之為邊鎬馬北平之為馬仁裕顏延之之為潘佑牛僧孺之為劉沆武夷君之為楊億王京之為王素已自墮落一層劉公幹為昏愚小吏澤公為浣衣婦人子羊祜出于隣家王練本于沙門王十朋出于嚴伯威韓滉為仲由又何輪迴之懸絕至是也明徐國公鵬舉為岳武穆托身馮宗伯琦為韓忠獻托身然皆功業不迨遠甚王文成前身為僧差不失故步耳然總之或揣摩近似夢兆偶符恍惚以一事為憑或逗漏于異人指點而悟耳讀稗官得數事馬玉堂閒話崔慎由初以未有子嗣頗以為念有僧常遊崔比之門崔因告之且問其

計僧曰請夫人感飾而遊長安大寺。有老僧院即詣之。彼若不顧更之。他所若顧我厚。當厚結之。俾感動其心。則其後身為公子矣。如其言。初過二處不顧。後至一院。僧年近六十矣。接待甚勤。至崔亦厚施之。自是供施不絕。僧乃曰身老矣。毋以報公。願以後身為公子。不數年。僧卒。而子生。手有網僧二字。錢氏私誌賢穆乳母永嘉董夫人。一日入禁中。慈聖問云大主以未得子為念。何不去玉仙聖母處求嗣。光玉遂擇日與賢穆同詣玉仙。止留知觀老道士一人祝香禮禱。道士見貴主車服之盛。欣艷富貴。云願得貧道與貴主做兒子歸。而有娠。明年四月十五賢穆夢玉仙觀知觀來。亟遣人問道士動靜。且祈禱。知觀自去年大主上廟後便不安。不下床日久矣。聞人聲。問甚處人來。報云錢大主臨筭。費香燭祈禱。知觀曰來催我也。是日告殂。大父寶闕善推步。午時遣人報光玉云符數七十有九。若今日酉時生。是有福。節度使伯兄果酉時生。平生淡薄。享壽七十有九。三朝野史。史彌遠父丞相浩。與覺長老道契極渥。史一日問之曰。我好和尚。好覺見堂中簾幙綺羅。榮華富裕。粉白黛綠。環列左右。乃應答曰。大丞相富貴好。老僧何好之有。既而曰。此念頭一差。積年蒲團工夫俱廢。未免墜落。一日浩坐堂上。儼然見貴長老揖而突入。使人往寺中。已圓寂于法堂。頃

時浩堂裡弄璋矣。夷堅志：葉文鳳，溫陵人，登進士第，調官天台簿。遇生日于旅邸假寐，夢人請乞麻糍，既覺，聞隣居老嫗號哭，問之曰：「亡兒忌日，作麻糍祭，享感泣耳。」文鳳問其所業，曰：「業詩，命取其舊業視之。」乃與葉及第程文一字無異。因拜嫗為前生之母，奉之別所。漫筆載：嘉靖甲辰，張子徵有外弟趙生，其前生為大同趙某子，列本學增廣生。暑日，迎督學，因涼次飲火酒，大醉，卧樹側，僕以水澆之，遂氣絕，魂遊水邊，見犬來畏為所嚙，適有孕婦在旁，避身婦邊，不覺入其婦孕中。是晚婦產子，生見已生為嬰孩，即悟託生在此北地貧家，生子不坐月。三日後，即往餉田間，時有一犬在床前，生呼其婦曰：「爾出外，須閉門，勿使犬近床。」婦人大駭，以為妖，欲擊殺之，乃不敢言。至五歲，見乘馬者呼其名曰：「我是爾某舅某生也。」其人驚報其家，以錢贖回。其妻尚未改醮也。又宣志：通州王居士有道德，會昌中刺史鄭君有幼女，甚念之，而自幼多疾，若神魂不足者。鄭君問諸王生，居士曰：「此女非疾，乃生魂未歸其身耳。」某縣令某者，即此女前身也。當死數歲矣，以平生為善，幽冥祐之，過期。今九十餘矣，令歿之日，此女當愈。鄭君使訪之，果有此令。後月，女忽若醉寤，再驗之，則令以女疾愈日卒矣。養痾漫筆：徽宗即江南李后主神祖，見秘閣江南李主像，再三歎其人物俊雅，而徽

宗生時夢李后主來謁所以風流文采過李主百倍及北狩女真用江南李主見藝祖故事高宗于韋后生時徽宗夢錢王再三乞還兩浙夢覺與鄭后言之而后夢亦同須臾報生高宗建炎渡錢唐建都百有餘年豈非乞兩浙之應乎神聖往還夙生直如旦暮此更其灼灼者安得謂釋氏之盡屬虛誣也

閉窗括異志蔡元度除杭州舟次泗州僧伽吐光直射其舟至高郵而沒世言元度乃木叉後身蜀搏杓孟知祥生時有火光照室鄰里異之有僧見而異之曰此五臺山靈也

幹離不陷汴京宋臣有詣其營者觀其形貌政與藝祖色相類伯顏下臨安有識之者後于帝王廟中見周世宗像與之分毫無異輪迴報應之說誕耶真耶

轉世情緣

轉世而仍悟前生史多有之前已畧及若隔生結再世之緣尤為異聞西州韋相公臯昔遊江夏止于姜使君之館姜氏孺子曰荆寶有小青衣曰玉簫常令祇候玉簫年稍長大因而有情韋以違覲日久辭歸因留玉指環并詩一首與玉簫為驗五年不至玉簫乃靜禱于鸚鵡洲又逾二年玉簫歎曰韋家郎君一別七年是不來耳遂

絕食而殞。姜氏以玉環着于中指，而同殞焉。後韋公鎮蜀，到府三日，詢玉簫，知其已殞，嘗增悽歎。有祖山人挾少翁之術，但令府公齋戒七日，中夜玉簫乃至，謝曰：承僕射寫經贈佛之力，旬日託生，却後十二年再為侍妾，以謝鴻恩。後韋公隴右之功，天下嚮附，瀘泃歸心，東川盧八座送一歌姬，未當破瓜之年，亦以玉簫為號，中指有肉環，隱出觀之，乃真姜氏之玉簫也。會昌解頤錄：長葛尉劉立妻楊氏，琴瑟甚和，忽一日妻病，沉困自度不濟，乃以小女美美為託。其夕楊卒，及立罷官，寓居長葛，又十年矣。縣令邀立鄣外看花，立先行三二里，見一杏園，中有婦女十數人，駐馬觀之。一女年可十五六，亦近垣中，窺立，入行百許步，至趙長史宅，入門見人物匆遽，主人移時方出，坐未定，有青衣耳語，趙起入內，出問曰：君某年某月為長葛尉乎？曰然。婦楊氏乎？曰然。有女名美美，僕名秋筍乎？曰然。趙歎息驚旋，有人喚秋筍入宅中，見一女子涕泣，問曰：美美安否？僕拜而出，不知其繇。趙乃以實告曰：女適看花暴卒，既蘇，自言前身乃公妻也。今雖隔生，而情愛未斷，適窺見公，不覺悶絕，立啟，嗟久之，乃曰：某今年尚未高，亦有名宦，願與小娘子尋隔生之好，于是成偕，而美美長于母三歲矣。又詩話：顧況暮年有一子，字非熊，暴亡，况哀悼不勝，乃作詩曰：老人喪愛子，日暮泣成血。老

人年七十不作多時別。非熊冥間聞之。以情告冥官。冥官憫之。却令再生。况家二歲能言。憶在冥間。父苦吟求再生事。猶歷歷然也。右三事至情所感。閱輪迴而宛然締結。精誠之至。天地從之。遂補生前之缺陷。韓憑之妻。徵永諧于暮木。唐暉之婦。稱誓志于幽冥。又不足言矣。

羽山化熊

任昉述異記。謂堯殛鯀于羽山。化為黃熊。入于羽淵。今會稽祭禹廟。不用熊白。黃熊即黃熊也。陸居曰。熊水居曰能。按鯀三足曰能。與熊殊不類。鯀之化熊乎能乎。淮南子。禹娶塗山。治洪水。通轘轅山。化為熊。謂塗山氏曰。欲餉。聞鼓聲乃來。禹跳誤中鼓。塗山氏往見禹作熊。慚而去。嵩高山下。化為石。禹曰。歸我子。石破北方而生。啓然則禹亦嘗化熊矣。又史正義云。鯀之羽山。化為黃熊。入羽淵。熊乃來切。下三點為三足也。東晉發蒙記。鯀三足能。能即黃熊。入寢之能。張守節不知何據。有三點之說。

牛哀化虎

人化虎者。牛哀封邵李勢妾外。唐高宗顯慶二年。晉州有人化為虎。原化記。松陽人入山採薪。會暮。為二虎所逐。遽得上樹。樹高不能及。虎忽相語曰。若得朱都事。應得

捷留一虎守之一虎乃去俄一虎細長善攫時夜月正明其人以刀斫之斷其前爪
大吼相隨去至明會村人相問因說其事村人云縣東有朱都事得無是乎同往候
之答曰昨夜暫出傷手乃驗其真虎以白縣令命群吏持刀圍而燒之朱都事忽奮
迅成虎去述異記宋元嘉中南康黃苗為州吏經宮亭湖廟下預希免罰當上猪酒
至州還資裝既薄遂不過廟行為神所錄命謫三年取三十人遣送窮山中以生肉
食之忽體生班毛性樂搏噬三年凡得二十九人次應取新塗一女此女士族初不
出外涉五年人數乃充神教發遣以湯飯飲之經十五日還如人形縣令呼苗具疏
其事所取人遍問其家並符合焉異苑晉太元十九年鄱陽柏闡殺犬祭鄉里綏山
煮肉不熟神怒即下教于巫曰闡以生肉貽我當謫令自食也其年忽變作虎冥祥
記魏時尋陽縣北山中蠻人有術能使作虎鄉人周賧有一奴使入山伐薪與其妹
婦俱往語二人云且上高樹去我欲有所為既而入草化成一大黃班虎奮迅哮吼
二人大怖頃復為人語二人歸慎勿道後漸洩周乃飲奴酒令醉詳視之無異惟于
髻中得一畫虎并符奴醒問之云先于蠻中糴穀遇一蠻師云有此符以斗米尺布
受其法異苑鄭襲晉太康中為太守門下駟忽如狂奄失其所經日尋得裸身呼吟

膚血淋漓。問其故。社公令作虎。以班皮衣之。辭以執鞭之士。不堪號躍。神怒。還使剝皮。皮已着肉。瘡毀慘痛。旬日乃差。瀟湘記。鄴中楊真好畫虎。至年九十。召孫覓謂之曰。我平生不合好畫虎。夢中多與群虎遊。晚年乃往往見虎。問同行人。又不見我。方恐懼。今卧疾。夢化虎。夢覺。乃復人身。死後。恐必化為虎矣。其夕卒。屍忽化為虎。跳躍而出。續玄怪錄。南陽張逢。貞元末。遊福唐縣橫山店。時初霽。日暮。曳杖尋勝。忽有一段細草。碧藹可愛。遂脫衣掛樹。投身草上。左右翻轉。意足而起。其身已成虎矣。恍惚自謂當食。福州鄭錄事。乃道傍潛伏。聞侯吏迎鄭者。詢來人。鄭錄事何時發。來人曰。到亦非久。三人之中。衣慘綠者是。其時方餓。而鄭到。逢啣之走。而上山恣食之。惟餘腸髮。既而思曰。我本人也。何樂為虎。盍求初化之地。而復焉。乃步步尋求。方到其所。細草依然。翻復轉身。其上意足而起。復為人形矣。元和六年。旅次淮陽公館。賓客各言己之奇事。逢自言橫山事。座末有進士鄭邀。乃錄事之子也。怒目而起。持刀將殺。逢象共隔之。逢遂獲避去。傳奇。明經王居貞。下第歸洛之潁陽。與一道士同行。道士盡日不食。至居貞睡。后燈滅。即開布囊。取一皮披之而去。五更復來。他日居貞伴寢。急奪其囊。道士叩頭乞還。曰。我非人。衣者。虎皮也。夜即求食。村鄙中。夜可馳五百里。

居貞以離家多時甚思歸曰我可披乎曰可也居貞遂披以歸見一猪立門外擒而食之乃還道士皮及至家云居貞次子夜為虎所食問其日乃居貞曰齊諧記晉太元元年安陸縣師道宣忽發狂變虎食人不紀後一女子採桑取食之藏其釵釧山石間后復人形而取之遂出仕官為殿中令史夜共人語自云曾化虎啗人言其姓名同坐人或有父子兄弟被食者共捉送官餓死建康獄中五行志唐長安中柳州佐史因病而為虎將噉其嫂村人擒獲雖形未全改而尾實虎矣因繫樹數十日還復為人廣異記荊州有人山行忽遇佹鬼以虎皮冒已遂化虎身雖虎而心不願后佹引經一寺門遽走伏僧牀下特有禪師能伏諸獸問弟子何所求耶為欲食人為厭獸身虎弭耳流涕禪師牽還本房半年毛落變人形高僧傳袁州山中一村院僧偶得虎皮戲披于身鄉人或畏而返走有遺其所携之物者僧喜每蒙皮而出常有獲遂時時為之一日衣粘着膚及伏草中遂成真虎捕狐兔充食復為鬼神所役甚厭苦之一旦餒甚一人過前躍而噬之則衲僧也心念身亦為僧自造惡業活變為虎乃殺僧充食地獄安容我哉因仰天大號聲未絕忽然皮落如脫自是一裸身也投俗家得破衣幾件因遊方求懺罪業南陽民忽患熱疾旬日不瘳夏夜月明暫于庭前

偃息忽聞扣門聲。見隔門有人云。君合成虎。今有文牒。開牒視之。排印于空紙耳。心甚惡之。疾似愈。忽憶出門散適。杖策行一里餘。照水中身。見其頭已成虎矣。入山兩日。覺饑。見一兔。試攫食之。甚美。忽見一老人。知是神人。遂哀告之。曰。汝明日合食一王評事。後當為人。一更已後。有微月。聞人馬行聲。空中人曰。王評事來也。擒之。曳入深榛。食之。食訖。心醒。却憶歸路。至澗邊。照之。則已為人矣。遂歸家。似沉醉。人月餘。平復。甯波陳十三。病瘧。經年不差。坐虎皮十載。而病如故。忽蒙皮夜出。化為虎。而前一足尚是人手。有人知者。曰。呼陳三老人。則弭耳而去。一夕雷震。死一虎。視之。即人手老人也。貴州平越山寨苗婦。入山迷不能歸。投食水中。蟲蠅不覺化為虎。成化間。餘姚王三與孫同卧。至夜必去。回則半體冷濕。其子疑而踪跡之。已變為虎。而足尚未全。執其足。遂逸去。不復回。后遇之。呼三老官。則咆哮去。又涪州裨將蘭廷雍妹。因竊物變虎。其前足上銀纏金釧。宛然涪陵里正范端。化為虎。後左足是靴。其母號哭。為脫靴。猶是人足。晉豫章郡吏易拔。眼目角張。便變成三足大虎。梁末。始興黃乾妹。小珠。過神廟。戀暮不歸。其僭李肅往看之。見一虎。脫牙爪。卷皮置床上。着衣向火看。乃小珠也。將歸。少日。又成虎。隴西皇族李微。于汝墳逆旅中。得狂疾。忽化為虎。龍編

公曹左飛曾化為虎。數月還作吏。虢州百姓王用貞元中因食黑魚忽脫衣吼躍變為虎。為村人格殺。身有黑子。頭仍是虎。偽蜀明德四年十月。百姓譙本罵母。忽然變虎。乾道五年。趙生妻李氏病頭風。家人聞虎吼走視之。化為虎頭。涪州里長好章辭家入山變為虎。二三日思家而號。上半身已變。而尚能語。趙不易為江陰僉判。妻病。惟喜啖生肉。婢媵侍疾者輒死。老兵持肉從戟門入。怒不食。自後園即食之。趙后待闕。衡州妻白晝化為虎而去。人謂戟門有神。而三婢遭其吮血。故殞也。劍州李忠病久。其子買藥歸。忠視子朶頭涎流。驚視。父已作虎形矣。扁室窺之。遂為真虎。至晉復陽縣。民家兒常牧牛。牛忽舐此兒。舐處肉悉白。俄而死。其家葬此兒。殺牛以供賓客。凡食此牛肉男女二十餘人。悉變作虎。斯又奇之奇耳。虎薈云。南蠻能化形為虎。以人為糧。江陵有驅人能化為虎。國史補。元和初。洪崖泊有役者。將化為虎。群眾以水沃之。乃不復化。俗言四指者天虎也。五指者人虎也。

取蜀將帥不利

自巴蜀通中國之後。凡割據擅命者。不過一傳再傳。而從東方舉兵臨之者。雖多以得雋將。帥輒不利。至于死貶。漢伐公孫述。大將岑彭來歙。遇刺客之禍。吳漢幾不免。

魏伐劉禪。大將鄧艾鍾會皆至。族誅。唐莊宗伐王行。招討使魏王繼岌。大將軍郭崇韜。康延孝皆死。宋伐孟昶。大將王全斌。崔彥進皆不賞而受黜。十年乃復故官。

創業不利長子

王元美曰。自古創業之君。俱不利長子。高辛氏顓頊。長子帝摯。不善崩。弟堯代立。陶唐氏帝堯。長子丹朱不得立。立舜。有虞氏帝舜。長子不得立。立禹。湯長子太丁。未立而卒。周泰王長子泰伯。文王長子伯邑考。一肇王跡。一剪商者也。泰伯伯邑考皆不得立。秦始皇長子扶蘇不得立。立胡亥。漢高帝長子惠帝。立而絕。文帝繼立。光武長子東海王。不得立。立明帝。魏武長子曹芳。戰沒。立文帝。孫堅長子策。無後。立權。孫權長子。和不得立。立休。司馬懿長子師。無子。立司馬昭。宋武長子義符。廢。立文帝。劉淵長子。和廢。四子聰。代。劉曜長子胤。前沒虜。止為王。苻健長子廢。立次子代。石勒長子弘。為虎廢。石虎長子邃。宣。俱前僂。慕容儁前子死。次子暉。立。慕容垂長子令。被殺。次子寶。立。齊蕭太祖長子武帝。立一世而絕。從子繼之。梁武帝長子昭明。早逝。次子簡文。代。陳武帝長子死。于江。從子備。立。北齊神武長子澄。殺。次子洋。立。周文長子安定公。立。而。少子武帝。立。隋高祖長子勇。廢。次子煬帝。立。唐高祖長子建成。僂。次子太宗。

立。朱梁太祖冕長子友文墜馬死。少子友貞立。後唐太祖克用長子落落亡。少子存
勗立。明帝長子從榮僂。從厚立。吳王楊行密長子渥廢。次子隆演立。南唐徐溫長子
知口以亂死。義子知誥立。蜀主王建長子元膺僂。次子衍立。南漢劉隱闡王潮子俱
不立。立弟。後蜀孟知祥公子在唐不得立。立昶。宋太祖長子德昭自殺。弟太宗立。大
宗亦作創始。長子元佐不得立。立真宗。契丹阿保機子東丹王不得立。立次子德光。
金阿骨打子蒲盧虎不得立。立弟吳乞買。元太祖長子先沒。立次子憲宗。世祖長子
真金與我。高皇懿文太子俱先沒。然則由古及今。創業之主。果為嫡長子而得傳
位及後人者。僅禹子啓也。亦異矣。

盜賊怨官吏

陳勝初起兵。諸郡縣苦秦吏暴。爭殺其長吏。以應勝。晉安帝時。孫恩亂東土。所至鹽諸
縣令。以食其妻子。不肯食者。輒支解之。隋大業末。群盜蜂起。得隋官及士族子弟。皆
殺之。黃巢陷京師。其徒各出大掠。殺人滿階。巢不能禁。尤憎官吏。得者皆殺之。宣和
中。方臘為亂。陷數州。凡得官吏。必斷鬻支體。探其肺腸。或熬以膏油。叢鏑亂射。備盡
楚毒。以償怨心。抗卒陳通為逆。每獲一命官。亦即梟斬。豈非貪殘者為吏。倚勢虐

民比屋抱恨思一有所出久矣。故乘時肆志人自為怒乎。又盜賊篡弑多以發塚為奇貨。漢廣川王去疾聚諸少年發塚以百數。赤眉董卓皆發漢諸陵。曹操置發丘中郎模金校尉。天下塚墓無問新舊盡遭發掘。黃巢入長安。唐諸陵皆被發掘。溫韜在鎮七年。唐諸陵在境者悉發之。昭陵圖書寶玩盡出人間。元楊璉真珈發宋諸陵。至取理宗項骨為枕。冤慘極矣。豈非多藏重器因而誨盜。珠襦玉押遂為貪夫所朵頤乎。

臨刑後貴顯

古之臨斬得釋而後大貴顯者。韓信外。武帝時王訢為被陽令。暴勝之欲斬訢。已伏質壯其言得不誅。後為丞相。部子儀當斬。李白救之。後為汾陽王。安祿山臨斬得釋。后遂封王。卒于叛逆。至淮南王英布犯法黥。後至有國。遂稱為黥布。五季周行逢為三鎮節度使。加侍中。宋狄青為使相。俱少常黥面。貴而不欲去其文。今人但知狄而不知周也。刑而至將相者。孫臏司馬臏。自刑者鬻拳。自宮者刁豎。

偽造芝草

宋仁宗慶歷二年六月。無為軍獻芝草。凡三百五十本。真宗大中祥符元年五月。以

十四本莫名士獻二十本山東巡按段顧言獻二十七本三十七年正月陝西鄠縣民王金獻芝山一座聚芝百八十一本內有徑一尺八寸者數本名曰仙應萬年芝山以祝聖壽上悅賞以金幣按宛委餘編稱世宗末年奸人王金于崇文門外積巨木置陰濕所以藥傳之即生芝隨藥成五色然則王欽若丁謂等所獻亦皆是物耳

黃金易五臟

夷俗有異者酉陽雜俎云東方之人鼻大竅通于目南方之人口大竅通于耳西方之人面大竅通于鼻北方之人竅通于陰中央之人竅通于口又曰無咎民其心不朽百年化為人錄民膝不朽埋之百二十年化為人細民肝不朽八年化為人大食國酋長死扶去腦實以珠玉五臟皆以黃金易之又造金鼻銀齒以人殉葬悅般國人能割人喉斷擊人頭骨碎陷血以草藥納口中須臾血止復生亦無癩痕尾濮蠻其人有尾長三四寸欲坐先穿地為穴以安尾尾折便死犁洞蠻葬則昇觀令一人擲雞子于地不破處即為吉穴奇羅國死則焚尸盛以金罌沉于海頓遜國人將死親賓歌舞于部外有鳥如鴉口如鸚鵡而紅色飛來食死人肉盡乃燒其骨沉海中

鮮卑國婚嫁先髡頭至三月男女大會然後從所愛配合私阿修國金遼山寺中有石龜衆僧飲食將盡向石龜作禮于是飲食悉具都波國結草為廬取百合草為糧緝烏羽為衣人死以木櫃盛尸置樹上室韋國以皮為丹屈木為室以猪皮為席雜度寐人一跳三丈又能于水中立浮卧浮履水而行如陸地然黠戛斯國赤髮青面綠瞳以黑髮為不祥黑瞳為野種男子黥手女子黥頂謂歲首為茂師哀以三哀為一時木耳國夷人黑如漆小寒則培沙自處但出其面洞冥記勒畢國人長三寸有翼善言語戲笑因名善語國常群飛往日下自曝身熱乃歸飲丹露為漿丹露者日初出有露汁如珠也元封三年鄴過國獻能言龜一頭長一尺二寸盛以青玉匣廣一尺九寸匣上豁一孔以通氣骨利國居回紇北方瀚海之北勝兵四千地出名馬晝長夜短天色正曛煮一羊胛才熟東方已曙蓋近日入之所也墨子越東有軋沐之國其長子生則解而食之謂之宜弟父死則負其母而棄之言鬼妻不可與共居楚之南炎人之國其親死剝其肉而棄之然後埋其骨乃成孝子也秦之西有義渠之國其親死聚柴而焚之薰其烟上謂之登烟霞然後成為孝榜葛刺國不飲酒恐亂性以薔薇露和香蜜水飲之堅昆國其人赤髮綠瞳李陵居其地生而黑瞳者必

曰陵苗裔八普城西瓜大者重五十斤可以容狐北印度土人不識雪歲二月麥感夏置錫器于沙中尋即鎔鑠馬糞墮地為之沸溢勿吉國嚼米為酒亦能醉人俗以溺洗手面初婚之夕男就女家執女乳乃成婚三童國人眼皆三珠或有四舌皆能言語康居國人皆深目多鬚釀葡萄酒至千石十年不敗以六月一日為歲首置一院畜狗甚多人死置院內令狗食之獅子國舊無人止有鬼神有龍居之諸國來市易不見人形但百貨俱集且示價商人依價償而取之哥羅國征伐皆乘象每一隊象百頭每一象百人衛之有官者方留髮嫁娶以檳榔為禮死則焚尸盛以金甕沉于海吐火國男多女少兄弟通室婦有五夫則首戴五角十夫則十角生子屬長兄白民國人白如玉國中無五穀惟種玉食之玉成椎為屑采近地樹葉同食之玉得葉即柔軟味甘而脆若宴客則以膏露浸玉屑少選便成美酒飲一升醉三年始醒人有活千歲者代宗大歷中曰林國獻靈光豆大小類中華之豆其色殷紅而光芒可長數尺本國亦謂之詰多珠和石上菖蒲葉煮之即大如鶩卵其中純紫秤之可重一觔帝啣一丸歎其香美無比數日不復言飢渴出杜陽編俱振提國城北隔真珠江二十里有神春秋時國王所須什物金銀器神厨中自然而出用畢而滅異苑西

域拘夷國山上有石駱駝腹下出水以金鐵及手承取即便對過惟匏蘆盛之者則得飲之。其身香爭而升仙其國神秘不可數過。又有水仙樹腹中有水謂之仙漿飲者七日醉異死。西域有鼠王國鼠之大者如狗中者如兔小者如常鼠大鼠頭悉已白然帶金環枷商估有經過其國不先祈祀者則噬人衣裳也。釋道安親至西方所見如此扶南國治生皆用黃金僦船東西遠近催一斤時有不至所雇欲減金數船主便作幻誑使船底砥折訶陵國以探花為酒期伽里舒國山有穴四季出火不燒林木焚石如炭淳泥國即古閩婆國以十二月初七日為歲節其地有藥樹取根煎膏塗其體兵刃不能傷也。孝臆國冬不凋落氣候長煖其人長軀黃髮綠眼赤眉被髮面如血色俗多妖祠每一日造食一月食之一臂國一臂一目一鼻柔利國人一手一足反膝曲居上軒轅國人面蛇身尾處首上末多國獻五味草初生味甘花時味酸食之使人不眠名曰却睡草此國人長四寸織鱗毛為布以文石為牀人形雖小而屋宇崇曠織鳳毛錦以錦為帷幕烏哀國有龍爪薤長九尺色如玉煎之有膏以和紫桂為丸服一粒千歲不飢故語曰薤和膏身生毛矮人國國人男女長止尺餘五歲生子八歲而老常為鸛鷄所食其兩沙爾馬齊國極寒人衣獸皮不露面只露口

眼食馬血風俗朴實犯盜者輒殺之。諸厄利亞國無毒蛇等虫。雖別處携去者到其地即無毒性。應帝亞國中國所呼小西洋。以應多江為名。一半在安義江內。一半在安義江外。天下之寶石寶貨自此地出。細布金銀椒料本香乳香藥材青朱等無所不有。故四時有東西海商在此交易。人生黑色弱順其南方少穿衣無紙以樹葉寫書用鐵錐當筆。其國王及其各處言語不一。以椰子為酒。五穀惟米為多。諸國之王皆不世及。以姊妹之子為嗣。其親子給祿而已。外國尚君子之國多木董之花。人民食之拾遺記。魏帝為陳留王之歲有頻斯國人來朝以五色玉為衣。如今之鍠不食中國滋味。自金壺中有神漿凝如脂。常一滴則壽千年。元封元年浮折國歲貢蘭金之泥。此金出于湯淵。盛夏之時水常沸湧。有若湯火飛鳥不能過。國人行者常見水邊有人治此金為器。混混若泥如紫磨之色。百鑄其色變白。有光如銀。名曰銀燭。常以為泥封諸笥匣及諸宮門。鬼魅不敢干。漢槃陀國正在須山。自葱嶺已西水皆西流。世人云是天地之中。土人決水以種。聞中國待雨而種。笑曰天何由可期也。窮神秘死。占城國王當賀日。以人膽沐浴。將領獻人膽為壽。其國人非至午不起。非至子不睡。見月則歌舞為樂。王死七日而葬。百官三日庶民一日皆以匣盛尸。積薪

焚之。其王骨則內金甕中。沉之于水。西北海有鶴。民國人長三寸。日行千里。而步疾如飛。每為海鶴所吞。其人亦有君子。小人。如君子性能機巧。每為鶴患。常刻土為己狀。或數百聚于荒野。水際。鶴以為人吞之。而有患。凡百千度。后見真者。過去亦不能食。人多在山澗溪岸之旁。穿穴為國。或三十步。五十步。為一國。羽氏國人有翼。飛不遠。有獸。綠毛似豹。毛可作筆。名虎僕毛。舊唐書。天竺屬有迦沒路國。其俗開東門。以向日。元史土哈傳。欽察國去中國三萬餘里。夜極短。日漸沒。即出沙彌茶國。係日西沒之地。至晚日入聲若雷霆。國王每于城上聚千人。吹角鳴鑼。擊鼓混雜。日聲不然。則小兒驚死。寰宇記。消石出鳥場國。能消金石。為水服之。悉得長生。其石出處氣極穢。惡。飛鳥不能過其上。人或單服。從過。身上諸虫悉化為水。而得長生矣。劫化他國中。天竺之屬國也。有石柱高七十尺。糾色有光。或觀其身。隨其罪福。悉自影中見之。馬國出大栗如梨。雞尾長五尺。作土室如粟。開戶于上。少年勇力者。以繩貫春皮。纏以大木。懼呼為健。以誇于人。長韓國以大鳥羽送死。其意欲使死者飛升。生兒便以石壓其頭。欲其扁。故其國人皆扁頭。挹婁國以豕膏塗身。厚半寸。以禦寒暑。則裸袒。以尺布蔽前後。其人臭穢。坐則箕踞。以足挾肉啖之。若冷肉則坐其上。令溫暖。將嫁娶。

男以羽毛搏女頭方卜日人死即日葬之殺猪積墓上以為死者之糧有哭者謂之不壯乙弗敵國人不食五穀惟食魚與蘇子狀如抱朴子或赤或黑見他國人便走避其行如飛吐蕃君與臣為友號曰共命其數不過五人君死之日共命人日夜縱酒封脚下針血出盡乃死殉葬又有君所親信者用刀鋸腦或以木刺兩肋死亦殉焉室韓國以皮為舟屈木為室以猪皮為席婚嫁兩家相許偕盜婦去然后行聘禮婦人不再嫁以為死人妻難共居也蘇門答刺國一名蘇文達那一名啞齊人物修長一日三變色或黑或口或青每歲殺十餘人取自然血浴身則四時不生疾病闔驄十二州志烏孫國嫁娶賞馬聘先令媒者與婦宿徐乃偕迎西域康者國生兒以石窰啖之置膠于掌欲長而甘言仲雲國其食粳沃以蜜結匈國其為人結匈羽民國其為人長頭身生羽謹頭國為人面有翼鳥喙方哺魚奇肱國其人一臂三目有陰有陽女子國兩女子居水周之有黃池婦人入浴出即懷妊矣若生男子三歲即死氏人國其為人面魚身而無足鬼國人面蛇身而一目三身國一首而三身在夏后啟北一目國一目中高而居深目國為人舉一手一目無腸國其為人長而無腸鬼國為人面而一目暹邏國男年二十陰必嵌珠玉及富貴者鉅金感珠有聲為美

婚則僧群迎僭至女家僧取女紅貼于男額曰利市喪禮富貴者則灌水銀而葬民
間則界尸投海洲有金色鳥數十飛來食之大將多用聖鐵裹身刀矢不能入聖鐵
者人腦骨也錫闕國煨牛糞灰遍體塗之牛則飲其乳而不食其肉阿枝國有濁肌
者蓋優婆夷之屬自胎髮不剃不禡以酥按之或十縷或七八縷垂于后古俚國有
罪不承服則寘其手指于沸油中半晌三日后驗之爛者伏辜全者免罪契母國在
庫莫奚東唐所謂黑水靺鞨者今其地也有七十二部落父母死而哭者以為不旺
以其骨置于山樹上經三年方取其骨而焚之梁四公記女國有六其一北海東方
夷有女國天女下降為其君其一西南夷板楯國西有女國其國女悍而男恭女為人
君以貴男為夫置男為妾媵其一昆明東南絕徼之外有女國以猿為夫生男類父
而入山谷晝伏夜游生女則巢居穴處其一南海有女國舉國以鬼為夫致飲食禽
獸以養之其一勃律山西有女國山出台虺之水女人浴之而有孕其女舉國無夫
其一西北有女國以蛇為夫男則為蛇不噬人而穴處女則為臣妾官長而處宮室
梁四公記扶桑有水精城可方一里天未曉而明如晝城忽不見其月便蝕北有滌
海西有乳海三海間方七百里大鴨生駿馬大鳥生人女皆殊麗美而少壽為人姪

妾不三十而死有兔大如馬毛潔白長尺餘有貂大如狼毛純黑亦長尺餘元中記
殷太戊使王英林樂于西王母至此絕糧不能進乃食木實衣以木皮終身無妻產
二子從背而出是為丈夫民去玉門二萬里又扶桑東千餘里有女國容貌端正色
甚潔白體有毛髮長委地至二三月競入水則娠六七月產子女人胸無乳項后
生毛根白毛中有汁以乳子百日能行三四年則成人矣瓜哇國今名加留巴一名
蒲家龍一名訶陵一名社婆其國室宇壯麗飾以金碧王蓬頭頂金葉冠瓊象前導
有金鎗珠篋孔雀尾傘國人見王皆坐俟其過乃起生子甫一歲以匕首珮之名曰
不刺頭真臘國今名東埔寨王仗劍立金窗中就坐獅子皮二領乃傳國之寶五月
迎佛遠近皆送水與國王浴身生女九歲擇僧道去其童身曰陣毬作字皆從后書
向前三佛齊國即天陀利又名渤淋其地冬無霜雪以國王指環為叩水多陸少惟
將領築屋以居庶民加木筏水上滿刺加屋如樓閣不更鋪板肌膚黑漆彭亨國刻
木為人像殺生人以祭柔神副王破彭亨國中鬼哭三日柔佛國一名烏丁樵持齋
見星方食以四月為歲首思吉港國人皆赤身一紙蔽其下體逐獐鹿而食佐以樹
酒文郎禺罕國山深處有烏籠里彈其人盡生尾又有買非國每夜盜人頭以金裝

之。和蘭國即紅毛番其人衣紅眉髮連頭俱赤。

人黑如漆增

晏陀蠻國人黑如漆能食生人訶陵國女人含毒涎液著草木立枯丈夫與之合者輒苦瘡三蠻國其人穴居土食而無陽點曼斯國人皆赤髮青面綠睛突浪國有大松林松子重數斤墮人首能殺人行者必戴兜鍪以備之鐵島地無水泉惟一大樹每日暮則雲氣縈抱降而為水卧蘭的亞國在海中冬三月夜而不晝夏三月晝而不夜作壺漏之物以辨晝夜當三冬時燃魚油為燈以代日光朦骨國目能視數十里外秋毫皆見羅夷尾閭有骨如獸尾久則化為熊獲數百歲不死室韋之北驅度寐之國坐浮水上距踊三文丁零之國拳髮馬蹄日走三百里牂牁之獠孕七月而生真獵之民十歲而嫁土壑之民兄弟通室西女之國產男不舉龜茲之俗以歲首七日鬪駝牛馬以卜畜牧之息耗馬者以元日角擊甲士卜歲之豐儉占城質疑於鰐魚烏長辨疑則嘗之以藥麻囉奴親死則搥鼓而食其齒日本髡首惟有喪乃畜其髮

欄樓變人視事

葉隆遠志。契母之先一主乃呵特。一髑體在穹廬中。覆之以氈。人不得見。國有大事。則殺白灰牛以祭。始變人形。出視事。事已即入穹廬。復為髑體。因國人竊視之。遂失所在。復有嗚呵。戴野猪頭。披猪皮。居穹廬。有事則出。退復隱入穹廬中。如故。后因妻竊其皮。莫知所終。后一主曰晝裏眠。呵堆養羊二十。日食十九。留其一次。日復滿二十口。皆極怪異。後漢書鮮卑傳。鮮卑投鹿候。從何奴軍三年。其妻在家生子。投鹿歸。怪欲殺之。妻言當書行聞雷震。仰天視電入其口。因之遂孕。十月而孕此子。必有異。投鹿侯不聽。遂棄之。妻私語家人收養焉。以吞電而孕。東胡呼電為擅石槐。故名為擅石槐。及長。勇健有智畧。部落推服。立庭于彌汗山。歆仇水上。白古通。天竺阿育王第三子驃。苴低子曰低牟苴。一作蒙分土于永昌之墟。其妻摩梨。羌名沙壹。世居哀牢山下。蒙迦獨嘗為漁。死池水中。不獲其尸。沙壹往哭之。見一木浮觸而來。婦坐其上。覺安。明日視之。觸身如故。遂時浣絮其上。感而孕。產十子。他日浣池邊。見浮木化為龍。人語曰。為我生子安在。眾子驚走。最小者不能走。倍坐龍。因舐其背。而沈焉。沙一謂背為九。坐為龍。名曰九隆。九隆長而智黠。嘗有天樂隨之。時哀牢有酋波息生十女。九龍兄弟娶之。厥後種類蔓延。分據溪谷。是為六詔之始。水經注。蜀王開明故治也。荆人鬻令

死其尸隨水上荆人求之不得。鰲令至汶山下邑復生起見望帝。望帝者杜宇也。從天下女子朱利自江源出為宇妻。遂王于蜀。號曰望帝。望帝立鰲令為相。時巫山峽壅而蜀水不流。帝使鰲令鑿巫峽通水。蜀得陸處。望帝自以功德不若。遂以國禪。號曰開明。錄異記黃武落鍾離山崩有石穴二所。一赤如丹。一黑如漆。有人出于赤穴者名務相。姓巴字。有出于黑穴者。凡四姓。暉氏。樊氏。楊氏。鄭氏。五姓皆出。各爭為長。于是務相約以劍刺穴。能着者為廩君。四姓莫着。而務相之劍懸焉。又以土為船。雕畫之而浮水中。曰若其船浮者為廩君。務相船獨浮。于是遂稱廩君。乘其土船。將其徒卒。當夷水而下。至于鹽陽。鹽陽水神女子止廩君。曰此魚鹽所有地。又廣大。與君俱止。無行。鹽神夜從廩君宿。旦輒去。為飛虫。諸神皆從。其飛蔽曰。廩君欲殺之。不可別。即以青縷遺鹽神。曰嬰此。即宜宜之。與汝俱生。不宜將去。女。鹽神受而嬰之。廩君望膺有青縷者射之。鹽神死。群臣與俱飛者皆去。天乃開。廩君復乘土船。下及夷城。因居之。種類遂繁。秦并天下。以為黔中郡。搜神記高辛氏有老婦人。居于王宮。得耳疾。歷時醫為挑治。出頂虫大如繭。婦人去後。置以瓠離。覆之以盤。頂虫乃化為犬。其文五色。因名盤瓠。遂畜之。時戎吳強盛。募得吳將軍首者。賜千金。封邑萬戶。又賜以

少女後盤匏銜得一頭。即是戎吳王重其信。即以小女從盤匏。盤匏將女上山三年。產六男六女。自相配偶。好山惡都。王順其意。賜以名山廣澤。號曰蠻夷。今梁漢巴蜀武陵長沙廬江群夷是也。世號赤髀橫裙。槃匏子孫又曰橐離國。王侍婢有娠。王欲殺之。婢曰。有氣如雞子。從天下來。故我有娠。後生子。捐之獐園中。猪以喙噓之。徙至馬樞中。馬復以氣噓之。故得不死。王疑以為天子也。乃令其母收畜之。名曰東明。常令牧馬。東明善射。王恐其奪已國也。欲殺之。東明走南至施掩水。以弓擊水。魚驚浮為橋。東明得渡。魚驚解散。追兵不得渡。因都王扶餘。晉書昔有如弗斯。出連叱盧三部。自漠北南出陰山。遇一巨蟲于路。狀若神龜。大如陵阜。乃殺馬祭之。俄而不見。有一小兒在焉。之仗部老父無子。請養為子。名曰紇干。驍勇善騎射。四部推為統主。北齊書。突厥匈奴別種。姓阿史那氏。其先世部族為隣國所滅。遺一兒十歲。則足棄草澤中。有牝狼以肉飼之。及長。與狼合。狼負至高昌國山穴中。生十男。各為一姓。阿史那其一也。北史四夷傳。夫餘國王嘗得河伯女。閉于室內。為日所照。引身避之。日影復逐。遂有孕。生一卵。大如五升。母置暖處。破出一男。及長。善射。因名朱蒙。朱蒙者。東夷言善射也。述異記。乾羅者。慕容廆之十一世祖也。着金銀襦鎧。乘白馬。金銀鞞勒。自

天而墮。卓鮮神之推為君。長虞集高昌王世勳碑叙其世家曰：畏吾兒之地有和林山。二水出焉。曰虎忽刺。曰薛靈哥。一夕有天光降于樹。在兩河之間。國人即而候之。樹生癭。若人。姓身然。自是光恒見者。越九月又十日而癭裂。得嬰兒。王收養之。其最穉者卜吉可罕。既壯。遂有其民人土田而為之君。地志：木葉城在廣寧城東。上建契丹始祖祠。首可汗在南。可敵在北。並塑人子像于側。遼史相傳昔有神人乘白馬。自馬孟山浮土河而東。有天女駕青牛車。由平地松林泛黃河而下。至木葉山。二水合流相遇為配。偶生八子。其後族屬漸繁。分為八部。每行軍及時發。必用青牛白馬云。湖廣施州衛城東南有竹王祠。昔一女子浣于溪。有竹二節浮至。聞兒啼聲。剖之得一男。及長。自稱夜郎王。以竹為姓。元中記：殷太戊使王英林樂于西王母。至此絕糧。不能進。乃食木實。衣以木皮。終身無妻。產二子。從背而出。是為丈夫民。去玉門二萬里。右諸書所述荒裔之君。其始出無不神怪。偽耶真耶。且外夷無載筆之史。誰從而溯其源流若此。